


明

書

八







書

明

〽

纂 麟 維 傳

明書卷四十一

志一

方域志三

山東省

山東古青兗地。冀之東境。徐之北陲。豫之支地。界兩都之間。外引江淮。內包遼海。西走趙魏。北屆滄瀛。蓋從古用武之邦。川陸孔道。畢會於德。海運旣廢。遂以濟西爲餽運通衢。南盡徐邳。北達天津。歲被河患。諸築濬牽挽之役。勞無休期。而兗州水潦爲虐。疾苦益滋。青多山壑。爲盜藪。禁戢尤難。東昌地頗饒。而河工盜擾。久爲凋瘵。登萊僻在膠東。三面距海。利在魚鹽蠶績。農田亦足自贍。自明季叛孽殘毀。生氣未能驟復。大抵二東之間。密邇京甸。京儲邊餉。徵發無時。且藩祿漸滋。供億繁苦。是以終明之世。盜賊孔多。若遼陽舊隸於東。尋復直隸。太祖定屬山東布政。戶口皆於斯稽上之。亦東地也。自爲區宇。沃野腴田。方四千里。舊爲郡縣。民稱安土。設衛以來。兵戈日尋。生齒疎落。而遷徙謫戍之人歸焉。卒兵連禍繼。淪棄不守。末年僅關外九城。大凌之役。復陷死十萬衆。悲夫。因敘二東。浩然致嘆。詳志於邊關。茲不複錄。山東六郡。初年戶七十五萬三千八百九十四。人口五百二十五萬五千八百七十六。末年戶一百三十七萬二千二

百六人口五百六十六萬四千九十九。設山東承宣布政司，分道四，府六，州十五，縣八十九。遼東都使司一，領衛二十五。衛河提舉司一。

濟南道領府一。

濟南府禹貢青州之域。西境連冀，天文危分野。春秋戰國屬齊。平公伐齊，戰歷下。漢韓信襲齊軍於歷下。其地也。秦屬齊郡。漢初屬齊國。文帝分置濟南國。景帝改郡。東漢仍爲國。俱治東平。晉移治歷城。劉宋僑立冀州。後魏改齊州，兼置濟南郡。隋罷郡存州。唐仍之。尋爲濟南郡。宋改興德軍。尋陞濟南府。元爲路。明爲府。東有瑯琊卽墨之饒，南有泰岱之因，西有濁河之限，北有渤海之險。俗多織作，士敦厚闊達多大節。淄之旁稍剽狙。章邱古高唐，鄒平古鄒國。萊蕪古夾谷，德州古平原。唐顏真卿效死地。領州四，縣二十六。

歷城 章邱 鄒平 淄川 長山 新城 齊河 齊東 濟陽 禹城 臨邑 長清 肥城

青城 陵 泰安州領新泰 萊蕪 德州領德平 平原 武定州領陽信 海豐 樂陵 商河

濱州領利津 霑化 蒲臺

海右道領府三。

青州府禹貢青州之域。天文虛危分野。古爽鳩氏之國。周禮正東曰青州。蓋以土居少陽，其色青，故名。成王滅蒲姑，封太公望，所謂營邱卽臨淄也。秦置齊郡曰瑯琊。漢置北海郡。晉爲北海樂安二國地。永嘉末陷於石勒。南燕慕容德都焉。北魏得之曰益都。唐爲青州。亦曰北海郡。置平盧節度。宋爲鎮海軍。元爲益

都路明改爲青州府。其地東北據海，西南距岱，東瑯琊，西濁河，四塞之固，海岱間一都會也。古云東西秦，蓋以形勝雄武，甲於諸方。士好經術，矜功名，崇學業，文物彬彬，而豪悍彊直，風氣剛決，民務農桑，多剽竊。領州一縣十三。

益都 臨淄 博興 高苑 樂安 壽光 昌樂 臨朐 安邱 諸城 蒙陰 莒州 領沂水

日照

登州府禹貢青州之域，天文危分野，唐虞嶠夷所居，夏斟鄩國，春秋牟子國，戰國齊，秦屬齊郡，漢屬東萊郡，漢武帝宿留東萊，望海中蓬萊，冀遇仙，其地也。隋置牟州，尋廢，唐復牟，改登州，治文登，又爲東牟郡，宋屬京都路，元屬益都，明初屬萊州府，後陞爲登州府，其地高山前阻，大海四環，惟一路通萊，僻在東陲，土地狹隘，山海曠觀，差爲雄勝，士崇學業，人力農桑，民樸野獷，直頗尙氣，健訟，領州一縣七。

蓬萊 黃 福山 棲霞 招遠 萊陽 甯海州 領文登

萊州府禹貢青州之域，天文危分野，古萊夷地，春秋齊侯遷萊子於郕，東故曰東萊，秦屬齊郡，漢爲東萊郡，晉爲國，隋唐爲萊州，或爲東萊郡，宋因之，元爲路，明爲萊州府，其地羅山互其東，濰水阻其西，神山距其南，渤海圍其北，土疎鳥鹵，襟帶山河，風土甲於青齊，人性剛強，士多文雅，俗稱樸質，而勇悍之氣，見於眉宇，矜功名，尙歸訟，高密爲平仲封邑，漢膠西國沙邱在掖縣地，領州二縣五。

掖縣 平度州 領濰 昌邑 膠州 領高密 卽墨

東兗道領府二

兗州府禹貢徐豫兗三州之城。天文奎婁分野。周爲魯國。秦薛郡地。漢爲魯國及泰山山陽郡。東漢爲任城國。兼置兗州。晉爲魯郡。北齊改任城郡。隋唐兗州或魯郡。後爲秦甯軍。宋宣和改襲慶府。元爲兗州。隸濟甯路。明爲兗州府。曲阜古窮桑地。神農少昊之都。周武王以封周公。鄒古邾。滕古小邾。嶧古鄆。金鄉古緡。魚臺故棠邑。單故單父。曹古豫州城。武王封叔鐸。曹縣東北二十里。漢高帝卽位於定陶。汜水之南是也。鉅野古澤。禹貢謂大野。旣濬者。東平古句須國。平陰。春秋魯襄公會伐齊。齊侯禦諸平陰。陽穀爲齊宋江黃所會之地。郟古郟子國。其地東盤瑯琊。西控鉅野。北走厥固。南馳互鄉。河濟間一都會也。有大聖人之化。尙禮義。重廉恥。君子絃誦爲習。小人桑麻爲業。然下邑多鄙野。領州四縣二十三。

滋陽 曲阜 甯陽 鄒 泗水 滕 嶧 金鄉 魚臺 單 城武 曹州 領 曹

定陶 濟甯州 領 嘉祥 鄆城 鉅野 東平州 領 汶上 東阿 平陰 陽穀 壽張 沂州 領

郟城 費

東昌府禹貢兗州之城。天文危室分野。春秋齊西鄙。聊攝之地。戰國爲衛齊趙三國之交。秦屬東郡平原清河三郡之地。晉屬平原國。宋置魏郡。隋唐爲博州。屬河東。宋仍之。屬河北。元爲博州路。尋改東昌路。明初改府。濮州古顛頊之墟。曰帝邱。夏昆吾氏所居。春秋衛成公都焉。東爲雷澤。曰姚墟。舜生地。高唐館陶之間。有漯馬頰故道。其地要衝。土平衍。漕河所經。俗好稼穡。士讀書懷義。有古風烈。獨濮染昆吾遺意。諂

佞狡悍士夫尤多詐而難信。領州三。縣十五。

聊城。堂邑。博平。茌平。清平。莘。

冠。

臨清州。領邱。

館陶。

高唐州。領恩。

夏津。

武城。濮州。領范縣。觀城。朝城。

山西省

山西古并冀州地。太行左峙。黃河右繞。五原錯落。四塞森羅。背臨朔漠。表裏河山。有俯挹中州之勢。百水南流。俱朝崑函。所以常受制於秦也。省治太原。古晉陽。并爲唐南京。忻代以北。邊患日尋。鴈門偏頭甯武。並置關戍。保德。河曲之西。與套虜盈盈一水。蓋不止大同爲要衝矣。汾潞之間。民稠地狹。逐末四方。并擁雄富。平陽曠邈。山溪四環。終明之世。未罹禍害。至蔚之鑛盜。臨晉之屯卒。潞城之逋民。多雜而難理。蓋惟其儉嗇褊急。果毅任氣。所以輕去其鄉。驚利棄家。大約供邊餉。給宗藩。仰給河東鹽課。不敷。皆取諸閭左。末季實多勞瘁矣。初年戶五十九萬五千四百四十四。人口四百七萬二千一百二十七。末年戶五十九萬六千九十七。人口五百三十一萬九千三百五十九。設山西承宣布政使司。分道四。領府五。州十。有九。縣七十有九。

冀甯道領府一。

太原府。禹貢冀州之域。天文參井分野。古唐國。高辛氏子實沈臺駘所居。堯封唐侯。舜以冀州地廣。分并州置牧焉。周以封太叔虞。曰晉。晉亡爲趙。秦置太原郡。兩漢因之。武帝置并州。魏爲太原國。隋爲郡。唐起

義於此曰北都。後爲并州大都督府。改太原府。天寶號北京。北漢劉旻據之。宋平北漢。墮其城。徙治榆次。元置太原路。後改冀甯路。明仍爲太原府。其地左恆山。右注之險。右阻大河北方山。南孟門。襟四塞。控五原。自古爲廣阻之國。一都會也。岢嵐。晉以後爲樓煩。胡所據。趙滅之。縣其地。祁縣。古昭徐祁藪也。民醱樸儉。素士好學。北陲尙武勇。善治生。多藏蓄。領州五。縣二十。

陽曲。太原。榆次。太谷。祁。徐溝。清源。交城。文水。壽陽。孟。靜樂。河曲。

平定州。領樂平。忻州。領定襄。代州。領五臺。繁峙。崞。岢嵐州。領嵐。興。保德州。

無所領。

河東道領府一。

平陽府。禹貢冀州之域。天文觜參分野。堯都平陽。春秋屬晉。戰國屬韓。後屬趙。秦漢爲河東郡地。三國魏始置平陽郡。隋改平河。唐改晉州。又爲平陽郡。五代置定昌軍節度。改建雄軍。宋因之。宣和中陞平陽府。元爲路。尋改晉甯。明復爲平陽府。洪洞古揚侯國。晉滅之。賜羊舌氏。趙城穆王以封。造父。曲沃。晉文侯弟成師封邑。冀城。晉絳邑。蒲坂。舜都。臨晉。古桑泉。滎河。古綸國。夏后少康起於此。魏汾陰。猗氏。古郇伯國。文王子封地。河津。古耿國。殷祖乙都焉。聞喜。實古曲沃。平陸。古虞。芮。故芮。絳。晉新田也。稷山。春秋晉侯治兵於稷。安邑。禹所營。吉州。古屈夷。吾所居。隰州。古蒲。重耳所居。夏有夏城。垣曲。有亳城。禹湯所都。其地背倚山險。南帶大河。接汾晉。揖關陝。水陸形勢。實天下要區。俗有堯之遺風。崇禮讓。儉樸無華。憂深思遠。多勇。

敢好積蓄。士彬彬有儒風。民好逐末。領州六。縣二十八。

臨汾。襄陵。洪洞。浮山。趙城。太平。岳陽。曲沃。翼城。汾西。蒲。蒲州。領臨晉。

榮河。猗氏。萬泉。河津。解州。領安邑。夏縣。聞喜。平陸。芮城。絳州。領稷山。絳。

垣曲。霍州。無所領。隰州。領太甯。永和。吉州。領鄉甯。靈石。

冀北道領府一。

大同府。禹貢冀州之域。周為并州。天文昴畢分野。春秋北翟居之。戰國屬趙。秦置雲中。城北長城。土紫曰紫塞。東漢末郡廢。晉屬鴈門。後魏徙都平城。置代尹。隋屬馬邑。唐初復置北恆州。治雲中。尋廢。後改雲州。復雲中郡。置大同軍節度。石晉沒於契丹。號西京。五代唐曰大同。遼為西京府。元置路。明為府。城東白登。城西為單于臺。代。古代國。廣昌為飛狐口。其地北臨廣野。東西碣石。柏梯凌峙。緜亙千里。為燕京藩屏。用武之國。俗質樸剛武。驕悍守業力穡。尚力習武。府城五方之人聚焉。俗稍華侈。競聲色。鬪妍冶。天下恆遊色於此。領州四。縣七。

大同。懷仁。渾源州。無所領。應州。領山陰。朔州。領馬邑。蔚州。領廣靈。廣昌。靈邱。兩魏末年省。一曰靈昌。尋

復分。

冀南道領府二。州三。

潞安府。禹貢冀州之域。天文參井分野。商黎國。西伯所勘也。周爲赤翟潞子國。戰國初屬韓別都。後屬趙。秦置上黨郡。晉徙治潞。後周置潞州。領上黨襄垣二郡。隋廢。唐復潞州。又爲上黨郡。後置昭義軍節度。屬河東。五代置匡義軍。宋改昭德軍。陞隆府。明初爲潞州。後改潞安府。其地極高。與天爲黨。故曰上黨。居天下之脊。當河朔之喉。肘京洛而履蒲津。倚太原。跨河汾。河東雄境。俗勤樸醜古。士尙氣節而務學。民力農。逐末能離鄉井。領縣八。

長治。長子。屯留。襄垣。潞城。壺關。平順。黎城。

汾州府。禹貢冀州之域。天文參分野。趙西河地。吳起所謂美哉山河之固也。秦漢皆太原郡地。三國魏置西河郡。治茲氏。晉爲國。後魏置汾州。治蒲子。後移西河。後齊治南朔州。後周改介州。唐改浩州。宋改汾州。西河郡。金置汾陽軍節度。元屬太原路。明初爲州。萬厯初陞爲府。設汾陽縣。割太原之臨縣。永甯州。甯鄉。平陽之靈石屬焉。尋還靈石於平陽。其地山川峭拔。生齒繁衍。士好文尙信。民勤儉好賈。領州一縣七。

汾陽。孝義。平遙。介休。石樓。臨。永甯州領甯鄉。

遼州。禹貢冀州之域。天文參井分野。春秋晉戰國韓。後屬趙。秦漢屬上黨郡。後魏爲遼陽郡。隋曰遼山。唐改遼州。尋改箕州。又改儀州。宋復遼州。元因之。明仍爲遼州。直隸山西布政司。其地多山谷。險峻深窄。地少平夷。居太行之巔。民信實而悍。俗厚少文。領縣二。

榆社。和順。

沁州。禹貢冀州之域。天文井分野。春秋晉銅鞮地。戰國先韓後趙。秦漢爲上黨地。魏置義甯郡。隋廢郡置沁州。又爲義慶郡。唐復沁州。後改陽城郡。宋曰威勝。元爲沁州。明因之。其地銅鞮案其前。龜山鎮其後。萬峰攢列。氣寒而僻。趙奢破秦軍闕與卽此地。俗專農事。重去鄉。異於他郡。直隸山西布政司領縣二。

沁源。武鄉。

澤州。禹貢冀州之域。天文觜參分野。春秋晉戰國趙長平地。漢分屬上黨河東二郡。後魏置建興軍。隋爲建州。唐改澤州。又爲高平郡。又改長平。尋徙治蓋州。宋元爲高平。明復爲澤州。直隸山西布政司。其地有太行之險固。爲東洛之藩籬。山高澗深。道路狹隘。俗力本好義。敦樸多藏。稱爲饒富。性質豪岸。少委曲。重儒術。領縣四。

高平。陽城。陵川。沁水。

河南省。

河南。古豫兗二州之域。冀之南境。徐之西北陲。當天下之中。閩闔方夏。四國輻輳。河流中貫。淮衛爲輔。而開封其都會也。北下衛漳達京圻。東沿汴泗轉江淮。車馬舳舻。可以交會。雖險塞不及關中。而水陸道里。故聖王謂之適中。第河患日急。終爲淪胥。彰德控趙魏懷慶。連晉冀衛輝淇汲。平臨四會。可謂要區。河南嵩洛環拱。上合垣星。古人建都。蓋有見於蔽山南而扼河北。稱形勝焉。汝甯南陽。下蘄黃。入襄鄖。又與江淮相表裏。而歸德睢陳之間。地兼數省。直走亳潁。徼徐諸山澤。姦人常藉以首難。雖彰懷亦連他省。然控

制差易。若考中州之地。山水環互。民物茂實。則汝甯爲優。至鑄山獵野。依憑險固。強弓利弩。出於其間。則河洛爲著。明則分封徧河南。宗祿日增。而輪轅經歷。日煩汗足。民生孔勞。及流寇發難於關西。漸蠶食中土。兵戈十餘年。燐火郊原。荒榛叟畝。向來民物繁集。皆爲狐鬼紛嘯之鄉。過客傷心。言之可爲墮淚。大抵國家腹旣病。則肢體困痺耳。悲夫。追往事者。未嘗不致恨於有用兵之責者。初年戶三十一萬五千六百一十七。人口一百九十一萬二千五百四十二。末年戶六十三萬三千六百六十七。人口五百一十九萬三千六百二。設河南承宣布政使司。分道四。領府八。州十有二。縣九十有七。

大梁道領府二

開封府。禹貢兗豫二州之域。天文角亢分野。春秋鄭衛陳之境。戰國魏惠王自安邑徙都之。秦屬三川郡。漢置陳留郡。晉改國東魏梁州。及陳留開封二郡。北齊併入陳留郡。郡城魏惠王築。秦攻魏。引河水灌而拔之。隋引河通淮漕。引汴水。唐置汴州。天寶初。改復陳留郡。五代梁都之。號東京。置開封府。晉漢周因之。宋建都於此。廣皇城。因洛陽宮殿爲之。而始壯麗。陷於金。元改爲南京。元改汴梁路。明復爲開封府。崇禎末年。河決開封。死者數十萬。移治權頭。而終不城郭。陳留杞國。陽武。秦博浪地。延津。鄭廩延。戰國爲韓都。陳州。伏羲都。曰太昊之墟。周以封舜。後媯滿於此。許州。許國。漢韓國。漢獻帝都許昌。襄城古汜邑。周襄王出居焉。長葛。春秋宋人伐鄭。取長葛。鈞爲禹封邑。春秋鄭櫟。周封黃帝。後於此。曰鄆。滎陽古虢。滎古澤也。河陰古鴻溝。汜水鄭虎牢。漢成皋。大抵其地爲天下要衝。四通八達。岡阜繚繞。夙號龍盤虎伏。然爲南北

爭場用武之地。人稟中和之氣。事詩書。右武習豪。重節義。勤耕織。風物繁侈。中天都會。領州四。縣三十。

祥符。陳留。杞。通許。太康。尉氏。洧川。鄆陵。中牟。扶溝。陽武。原武。封邱。

延津。蘭陽。新鄭。儀封。陳州。領商水。西華。項城。沈邱。許州。領臨潁。襄城。鄆城。

長葛。禹州。密。鄭州。領滎陽。滎澤。河陽。汜水。

歸德府。禹貢兗豫二州之域。徐之西境。天文角亢分野。古商邱地。高辛氏子閼伯所居。周封微子啓爲宋。戰國齊楚魏三分其地。秦碭郡。漢梁國。隋置宋州。唐因之。尋改睢陽郡。五代梁爲宣武軍節度。宋陞爲南京。應天府。屬京西路。金爲歸德府。更宋城曰睢陽。元因之。明初降爲州。後復府。寧陵古葛伯國。虞城商均封地。柘城古朱襄氏邑。卽陳株林。其地控河面淮。聯蕭接碭。廣衍膏沃。俗重厚多材。頗豪斂力。穡尙氣多致富藏。領州一。縣八。

商邱。寧陵。鹿邑。夏邑。永城。虞城。睢州。領考城。柘城。

河南道領府一。

河南府。禹貢豫州之域。天文柳分野。武王克商。定鼎於郊廓。至成王營成周。卜澗水東。灋水西。宅洛邑焉。爲王城。又於灋水東遷殷頑民居之。曰下都。平王因犬戎之亂。自鄆徙都之。曰東周。秦置三川郡。漢置河南郡。光武都之。置河南尹。司隸焉。魏爲司州。晉亦以都故置尹。苻秦改豫州。魏孝文自代徙都之。後東西魏分其地。唐置洛州。後改河南府。宋爲西京。金號中京。元爲河南路。明更爲府。偃師帝嚳都。成湯居西亳。

卽此盤庚復都之孟津卽武王誓師之地宜陽召伯聽訟之所登封古陽城禹避舜子於此嵩縣古伊關秦晉遷陸渾戎於此陝州古虢國卽漢宏農都也其地南望三塗北望嶽鄙泝洛背河左伊右瀍函谷咽喉三河鼎足爲天地之中其俗忠義疊見刑訟清簡士知詩書民迫營養行誼純樸不事華侈生性悍率傲然遣人領州一縣十三

洛陽 偃師 鞏 孟津 登封 宜陽 永寧 新安 澠池 嵩 盧氏 陝州 領靈寶 闕鄉

汝南道領府二州一

南陽府禹貢豫州之域天文張分野本夏禹之國周爲申伯鄧侯所封春秋楚戰國韓秦取韓地自漢以北置南陽郡治宛漢屬荊州晉爲南陽國宋齊并爲郡隋罷郡置鄧州唐仍之尋爲南陽郡宋屬京西南路金置申州元爲南陽府明因之其地北有成皋之固西有商阪之阻東有宛穰受淮海之饒南爲襄漢藩籬諸葛以爲用武之國士敦詩書民務耕稼尙氣多賈純樸硜質有古風女好遊以近漢俗也領州二縣十一

南陽 鎮平 唐 泌陽 桐柏 南召 鄧州 領內鄉 新野 淅川 裕州 領舞陽 葉

汝寧府禹貢豫州之域天文角亢氏分野春秋沈蔡二國地戰國楚魏分境漢汝南郡劉宋立司州以汝水曲如懸瓠號曰懸瓠魏太初力攻不能拔者也後魏改豫州東魏置行臺周置總管府唐復因隋爲豫

州。後置汝南郡。改蔡州。元和中。吳元濟以蔡叛。李愬夜入城誅之。宋爲淮康軍節度。元爲蔡州。陸汝寧府。明因之。汝陽沈國。上蔡蔡國。信陽申國。確山江國。光山弦國。其水縈紆。其地平舒。襟淮振穎。爲四方之最。中故有天中山。人性躁勁。風氣果決。士兼質文。民俗醇樸。而豪右強競。每苦閭細。領州二縣十二。

汝陽。眞陽。新蔡。上蔡。西平。遂平。信陽州。領羅山。確山。光州。領光山。固始。息。

商城。

汝州。禹貢豫州之域。天文張分野。春秋鄭。戰國韓。後屬魏。秦屬三川郡。漢屬河南。後周改和州。隋始更汝州。唐因之。後置臨汝郡。又曰伊州。宋又改汝州。屬京西北路。金爲刺郡。元仍汝州。屬南陽。明初屬汝寧。後直隸河南布政司。其地右臂三塗。左槩嵩岳。面據衡陰。背倚王屋。浸以陂澆。演以榮洛。士漸學業。民事耕桑。領縣四。

魯山。郟。寶豐。伊陽。

河北道。領府三。

彰德府。禹貢冀州之域。天文室壁分野。殷王河亶甲徙都之。春秋晉東陽。魏鄴地。秦上黨邯鄲二郡地。漢置魏郡。治鄴。東漢徙冀州於此。曹操封邑。石虎慕容儁。東魏北齊俱都焉。後周改相州。及魏郡。治安陽。唐仍相州。五代爲彰德軍節度。宋復相州。元改路。明爲彰德府。安陽古洹水。湯陰古姜里。臨漳魏文侯初封邑。其地旁極齊秦。跨躡燕趙。地土廣行。有清濁二漳。經其境。爲天下要衝。海內有變。先被兵。得京洛之風。

俗稱醕古人尙英雄勤於營生儉於用度領州一縣六

安陽 湯陰 臨漳 林 磁州 武安 涉

衛輝府禹貢冀州之域天文室壁分野殷紂所都朝歌地也武王平殷分其北爲邯西爲鄴東爲衛封康叔焉戰國魏秦屬河東漢屬河內曹魏置朝歌郡屬冀州晉改汲縣後魏徙郡治枋頭而於此置義州尋廢唐復義州改衛州又爲汲郡屬河北元爲衛輝路明改爲府汲牧野胙城古胙國周公別子封地輝古共國其地左孟門右太行南臨大河西連上黨蘇門百泉擅山水之秀爲要衝地士向學有文采人剛武尙力俗饒裕勤於耕耘重義氣疎財賄有古人之風領縣六

汲 胙城 新鄉 獲嘉 淇 輝

懷慶府禹貢冀州之域天文室壁分野古覃懷地殷爲畿內周三監後屬晉戰國爲魏衛鄭三國分境漢初爲殷國尋改河內郡置野王縣後魏置懷州隋爲郡唐爲州尋復河內郡宋因之屬河北西路元改懷孟路又更懷慶路明改府山川延袤雄跨衛孟舟車都會號爲陸海其俗崇儉固息侈肆士頗知書風稍鄙陋田多半在山谷間故耳領縣六

河內 濟源 修武 武陟 孟 温

陝西省

陝西古雍州地梁州北境爲周王畿山河四塞神皋奧區所謂天下之勢秦得百二形勝甲於天下秦漢

盛唐都焉。西安東扼崑函。北帶河流。八水環繞。終南表闕。生齒繁盛。百貨走集。關中大都會也。平涼固原。豐草曠野。畜牧蕃滋。而外乏屏蔽。虜騎飄來。頻年蹂躪。鞏鳳延慶間。士馬精強。號爲雄劇。寧夏跨有賀蘭。黃河之險。別爲一區。水穀自饒。爲備較易。所以河西蘭州之地。山水秀麗。洵矣樂土。自移鎮榆林。而後河套盡棄。烽火達內郡矣。斥堠之封漸蹙。世宗時議復議征。皆不果。而任事者殘。不亦悲乎。甘涼左番右虜。勢處孤危。而洮岷錯入於番夷之外。稍有不虞。則西海之濱爲戰場矣。鳳河回種繁盛。無賴姦頑。多逃匿於內。時有可憂。若漢中關河險阻。棧路逶迤。昔李自成困阨於中。總督陳奇瑜大兵雲集。不卽掃除。誤聽姦謀。放之出柙。遂致燎原。終使鼎籙淪喪。識者未嘗不致恨於斯人也。明末流寇之起。源於延安七載。曠荒有司不爲撫循。而且培削之。以致黨結禍生。不可撲滅。嗟哉。大約秦人彊武。獷悍非他省比。易亂而難馴。况凋瘵蕭條之後耶。初年戶二十九萬四千五百二十六。人口二百三十一萬六千五百六十九。末年戶三十九萬四千四百二十三。人口四百五十萬二千六十七。設陝西承宣布政使司。分道六。領府八。州二十一。縣九十四。都司行都司各一。領衛三十有九。所十六。儀衛羣牧八。關內道。領府一。

西安府。禹貢雍州之域。天文井鬼分野。周武王克殷。都豐鎬。豐在豐水。鎬其東。皆在長安界。曰宗周。平王東遷。以賜秦。秦并天下。置內史。漢改京兆尹。左馮翊。右扶風。爲三輔。晉魏周隋。以至於唐。皆建都焉。唐末爲佑國軍。五代改永平軍。宋仍京兆府。屬永興軍。元改安西路。又改奉元。明爲西安府。咸陽秦孝公居。臨

潼古驪戎國。幽王死焉。漢新豐。秦卽左鄜。有扈國。殷崇國。右輔地。爾雅。山曲曰整。水曲曰屋。商契始封邑。同州漢左輔。治朝邑。古蒲關。白水古彭衙。韓城古少梁。華州鄭桓始封。曰咸林。乾州唐奉天。武功古郃。禹貢所謂棗棗也。邠州古西戎地。公劉居之。曰豳。其地左嶠函。右蜀隴。中膏田沃壤。號爲陸海。終南障之。南有巴漢之饒。北有胡苑之利。古稱金城千里。天府之國。其俗五方雜處。尙氣槩。先勇力。勤於耕蠶。習俗醜樸。務從儉約。士多儒流。英豪輩出。藍田左右山鄙。亢厲。而與省會繁富。則天淵矣。領州六。縣三十一。

長安 咸寧 咸陽 興平 臨潼 高陵 鄠 藍田 涇陽 三原 整屋 渭南 商州 領

鎮安 洛南 商南 山陽 同州 領朝邑 郃陽 澄城 白水 韓城 華州 領華陰 蒲城

耀州 領同官 富平 乾州 領醴泉 武功 永壽 邠州 領淳化 三水 長武

關西道領府二

鳳翔府禹貢雍州之域。天文井鬼分野。周岐雍地。秦故都。漢屬右扶風。三國魏爲扶風郡。屯重兵。陳倉。諸葛亮攻之不下者也。後魏置平秦郡。兼置岐州。又爲扶風郡。置鳳翔節度。隋岐州。唐復鳳翔。又爲西京。五代改關西郡。宋爲秦鳳路。元爲鳳翔府。明因之。其地岐及梁山。奠其東北。岍與吳山。互其西南。岐谷如犬牙。五丈原如長蛇。襟帶環合。一大都會。雄博差次。長安實踰諸郡。民厚重質直。鮮惰習。勤稼穡。喜射獵。士多儒雅。風古而峭勁。領州一。縣七。

鳳翔 岐山 寶鷄 扶風 郿 麟遊 隴州 領汧陽

平涼府禹貢雍州之域。天文井鬼分野。春秋爲朝那。秦屬北郡。漢析置安定郡。晉徙治臨涇。屬原州。隋爲安定郡。又析置平涼郡。唐初屬原州。詩所謂至于太原也。宋改涇原路。置經略安撫使。金元爲平涼州。明陞爲府。其地山川險拔。襟帶中華。水土雜於河西。人煙接於北境。旁扼夷落咽喉。靈武控制西陲。實爲要地。俗醱樸近古。士尙氣略。人以騎射爲業。頗矜耕織。悍直其本性也。領州三。縣七。

平涼 華亭 鎮原 崇信 固原州無領 涇州 領靈臺 靜寧州 領莊浪 隆德

關南道 領府一

漢中府禹貢梁雍二州之域。天文井鬼翼軫分野。周襄國。周衰。鄭桓公沒於犬戎。民南奔居焉。曰南鄭。始皇置漢中郡。項羽封漢高祖令都之。武帝分隸益州部。東漢末爲張魯所據。魏取之。後爲蜀得。晉置梁州。宋齊梁後魏皆以梁州治漢中。隋爲漢中郡。唐復梁州。改襄州。尋復。德宗陞爲興元府。宋仍之。元爲路。明改漢中府。其地東接南郡。西接陰平。南連漢廣。北扼秦川。崖谷峻絕。數里百折。爲成都喉隘。巴蜀屏捍。天下之險地有三。此其一也。風氣強梁。直樸無文。務農習射。人多英武。領州二。縣十四。

南鄭 褒城 城固 洋 西鄉 鳳 寧羌州 領沔 略陽 興安州 領平利 石泉 洵陽 紫陽 漢陰 白河

河西道 領府二

慶陽府禹貢雍州之域。天文井鬼分野。周先公不窋所居。號北豳。春秋爲義渠戎。秦滅義渠。以其地屬北

地郡。漢因之。東漢至晉。復爲戎。有後魏置朔州。唐爲慶州。後改安化郡。已復改順化。又復慶州。陸安定軍。宋因之。范仲淹築大順城。其地也。於是合環州爲環慶路。後爲慶陽軍節度。又陞府。元置路。後爲府。明因之。其地原阜列峙。溝澗輻輳。爲關輔保障。民浮士慤。勇武多材。俗尙耕獵。人多穴處。領州一縣四。

安化。合水。環。寧州。領真寧。

延安府。禹貢天文同慶陽。春秋白翟地。秦屬上郡。項羽三分秦地。以董翳爲翟王。都高奴。其地也。漢初置翟國。尋屬上郡。晉陷於戎。後魏爲統萬鎮。未幾置金明郡。後改延州。唐因之。或爲延安郡。爲衛國軍節度。五代改忠義軍。後更爲彰武軍。宋初因之。元祐中。陞延安府。鄜延路。屬永興軍路。元改延安路。明爲府。其地爲三水所會。五路襟喉。倚山爲城。因河爲塹。形勝之區。人勤稼穡。俗尙鬼神。儉而不靡。性樸直。好武勇。忠義輩出。領州三縣十六。

膚施。安塞。甘泉。安定。保安。宜川。延川。延長。清澗。鄜州。領洛川。中部。宜君。
綏德州。領米脂。葭州。領吳堡。神木。府谷。

隴右道。領府二。

鞏昌府。禹貢天文同慶陽。春秋戎羌所居。秦取之。屬隴西郡。東漢分置南安郡。魏分改隴西郡。治襄武。南安郡治獮道。後魏增置安陽爲三郡。兼置渭州。唐仍之。中陷於吐蕃。宋皇祐中。置右衛寨。崇寧中。改鞏州。金始爲鞏昌府。元改路。明爲府。其地接壤戎羌。通道隴蜀。背山面池。土地險阨。得兩戒山河之首。伏羲所

生之地。俗尙氣力。俚而不澆。禮循古制。好獵重農。尤多蓄牧。領州三縣。十有四。

隴西。安定。會寧。通渭。漳。寧遠。伏羌。西和。成。秦州。領秦安。清水。禮。

階州。領文。徽州。領兩當。

臨洮府。禹貢天文同慶陽。春秋戰國皆羌地。秦漢爲隴西郡。趙充國擊羌。屯金城。馬援破先零於臨洮。其地也。晉析置狄道郡。六季爲武始。臨狄。金城郡。唐置臨洮軍。寶應中陷於吐蕃。宋爲鎮洮軍。尋改熙州。治狄道。金元爲臨洮府。明因之。其地境接巴嶺。地控邊陲。山勢聳峻。土田肥美。南皋蘭。北黃河。有長城之勢。俗勁質木彊。喜武務農。文雅之風。殊遜他郡。惟蘭州風物流美。有江表之觀。領州二縣三。

狄道。渭源。蘭州。領金。河州。無所領。

西寧道。領衛五。

寧夏衛。禹貢雍州之域。天文井鬼分野。亦羌戎地。秦屬上郡。漢置朔方郡。晉亂。赫連夏據有其地。後魏周隋爲夏州。尋分爲宏化。懷遠。朔方郡。唐爲靈武郡。肅宗卽位於此。曰靈州。宋拓跋思恭鎮夏州。遂據之。其孫德明城懷遠爲興州以居。所謂西夏也。元置寧夏路。明初更爲府。後廢府設衛。隸陝西都司。其地黃河東繞。賀蘭西聳。倚河津。近重塞。爲西陲巨屏。人以技藝趨利。蓄牧爲資。好武信鬼。尙詛祝。敢戰鬪。領衛五。

寧夏前衛。左屯衛。右屯衛。後衛。中屯衛。

寧夏中衛。古靈州地。元初置應理州。明建寧夏中衛。領州五。左右中前後。其地東阻河。西據沙山。邊陲保

障。人性勇悍。同寧夏。

洮州衛軍民指揮使司。禹貢雍州之域。天文井鬼分野。古爲諸戎所居。後吐谷渾據有之。後周始置洮陽郡。唐爲洮州。李西平生其地。唐末陷吐蕃。曰臨洮城。宋復置洮州。明改置衛。領千戶所五。其地西接番戎。東蔽湟隴。險阻之區。人性勁悍。衣褐食肉。以射獵爲生。去戎習幾希耳。

岷州衛。禹貢天文同洮州。古西羌地。秦屬臨洮。西魏始置州。尋爲同和郡。唐改和政。後復爲岷州。宋置西和州。元於祐川置宣慰。明改爲岷州衛。領千戶所四。軍民千戶所一。堡八。

西固城軍民千戶所。

河州衛。古西羌地。秦漢屬隴西郡。隋曰抱罕。唐改河州。又爲安鄉郡。宋改寧河縣。元爲路。明初爲府。後改爲衛。其地東繞洮河。西峙積石。雪嶺盤鬱。黃河旋束。人番漢雜居。好佛尙武。領所七。堡二十四。

左所。右所。中所。前所。後所。中前所。歸德守禦所。

靖虜衛。屬邊道。古西羌地。秦漢屬隴西。後屬金城。後魏曰會寧。唐更爲粟州。宋改敷文州。元因之。明更爲靖虜衛。領千戶所四。其地面山背河。地形險固。人性勇暴。不憚攻殺。鄙而無文。

文縣守禦千戶所。直隸陝西都司。周爲雍州地。戰國爲氐羌所有。漢開西夷。置廣漢郡。晉更陰平。隋置武都郡。唐更文州。宋曰利州。元改屬鞏昌。明初置縣。尋爲軍民所。其地左山右江。邊陲要地。東接漢中。爲蜀咽喉。士稍知書。習雜氐羌。人性剛勇。士瘠民貧。力農不贍。濟之以畋獵。

陝西行都司古月支國後爲匈奴所據漢武帝時始拓置酒泉武威張掖金城燉煌五郡斷匈奴右臂所謂河西五郡也宋末張軌據此爲前涼呂光繼之爲後涼及李暠遷酒泉爲西涼沮渠蒙遜據張掖爲北涼後入魏爲甘州唐屬隴右郡尋淪吐蕃宋金爲西夏所據元立甘肅路明置陝西行都指揮使司統軍民其地萬山環抱三峽重圍地志以爲涼州險絕土饒沃翼以祁連合黎之山浸以居延鮮卑之水爲羌戎通達民俗質樸綽有華風人性慷慨崇釋教習兵事穴居者甚多以織褐爲業領衛十二所二

甘州中

甘州左

甘州右

甘州前

皆故昆邪王地古張掖居延

甘州後

肅州

古酒泉

山丹

古刪丹

永昌

西涼

涼州

古姑臧

鎮蕃

威武

莊浪

尤吾

西寧

湟中

鎮夷所

古浪所

明書卷四十二

志二

方域志四

四川省

四川古梁州地。荆之西鄙。中長川沃野。擅山林。竹木、穀粟、蔬果、織作、染練之饒。劍閣表雲棧之固。瞿塘扼巴峽之流。界以番族。阻以蠻部。山水襟束。自相藩籬。坤維井絡。斗絕諸夏。故姦雄竊據。則兵莫西窺。以地饒而險扼。備耳。山川綢繆。實爲天險。而成都其都會也。第姦宄內作。懸車束馬。壹不相及。有難猝定者矣。以故松疊威茂。安縣敍夔。明朝皆宿重兵。蒞以憲臣。而彈壓之。獨松潘以孤城界在番域。而寄咽喉於龍州。千里轉輸。每爲夷梗。烏撒芒部諸地。雖犬牙形格。仰我鼻息。然內相黨結。數起兵端。且於敍瀘有唇齒之重。指臂之形。實川南重地。若碉門之腋。視諸番。播州之富藏。四省殆與全蜀爲盛衰。建昌六衛。僻處西徼。自爲奧區。民夷安業。明末爲張獻忠殘毀。終世不復。遂成灌莽。虎豹縱橫。繁聚殷田。非復昔比。而蜀不堪復問。茲特紀其盛時云爾。初年戶二十一萬五千七百一十九。人口一百四十六萬六千七百七十八。末年戶二十六萬二千六百九十四。人口三百一十萬二千七十三。設四川承宣布政使司。分道四。領府

九軍民府四州二十一縣百有十四。設都司二。領衛二十二。守禦所二十四。宣撫司三。招討司一。安撫司八。長官司四十七。

川西道領府一。

成都府禹貢梁州之域。天文井鬼分野。黃帝子昌意娶蜀山氏女。生帝嚳。因封其支庶於蜀。秦并之爲蜀郡。漢分置廣漢郡。武帝置益州。蜀郡隸焉。蜀先主都之。於益州置牧。蜀郡置守。晉改爲成都國。尋復蜀郡。唐復益州及劍南節度。祿山亂。玄宗幸蜀。號成都曰南京。五代王建孟知祥據其地。宋爲益州路。元因之。元末明玉珍據之。都重慶。號大夏。明太祖以大將軍友德破之。玉珍子昇來歸。定爲成都府。其地沃野千里。天府之國。華陽西極。黑水南流。西抗吐蕃。南扼蠻獠。岷嶓奠麗。爲天下雄藩。民饒魚稻。無凶年。俗不愁苦。多工巧。綾錦雕鏤之物。被天下。昔置錦官主之。曰錦官城。人好逸樂。士多文雅。善談論。女淫而不檢。諸郡皆然。領州六。縣二十五。

成都 華陽 雙流 溫江 新繁 新都 金堂 仁壽 井研 郫 資 內江 灌

彭 安 崇寧 簡州 資陽 崇慶州 領新津 漢州 領什邡 緜竹 德陽 緜州 領彰明

羅江 茂州 領汶川 威州 領保

川北道領府二州一。

保寧府禹貢天文同成都。古巴國。秦巴郡地。漢晉巴西郡。徙治閬中。梁爲北巴郡。兼置南梁州。西魏改南

梁曰隆中。又更北巴曰盤龍郡。唐復隆州。改閬中郡。五代唐置保寧軍。宋改安德軍。元陸保寧府。尋改路。明定爲府。地在劍南巴峽羣山礪确中。爲梁洋梓益之衝。前界關表。後倚劍閣。棧道千里。緣山爲門。爲蜀吭要地。士文雅貪譎。土風醇厚。民多豪武。領州二縣八。

閬中。蒼溪。南部。廣元。巴州。領通江。南江。劍州。領梓潼。昭化。

順慶府。禹貢梁州。周雍州之域。天文參井分野。秦屬巴郡。漢分充國諸縣。晉屬巴西。劉宋析置宕渠郡。隋廢。復巴西。唐置果州。治南充。改充州。五代蜀置永寧軍節度。宋以充州隸梓州路。南宋陸順慶府。元改路。明復爲府。其地南連巴徼。北挹通川。山川迴環。形勢峭邃。賓人剽勇。土俗質陋。喜賈好禱。士多儒術。領州二縣八。

南充。西充。蓬州。領營山。儀隴。廣安州。領渠。大竹。岳池。鄰水。

潼川州。禹貢梁州之域。天文井鬼分野。秦屬蜀郡。漢晉宋齊並屬廣漢郡。梁置新州。西魏置長城郡。隋梓州。唐因之。或爲梓潼郡。宋改靜戎軍。尋改安靜。已又更劍南。升爲潼川府。元爲州。明因之。直隸布政司。其地左帶涪水。右挾中江。沃野膏壤。水陸要會。人性輕揚。喜虛稱。尙奢靡。女淫而好音樂。士通詩書。領縣七。

射洪。鹽亭。中江。遂寧。蓬溪。安岳。樂至。

川東道領府二。

重慶府。禹貢天文如成都。周巴子國。曰三巴。秦置巴郡。漢因之。晉爲巴都郡。宋齊復巴郡。治江州。今江津。

也。後或爲楚州。又爲巴州。隋改渝州。唐因之。後改南平郡。五代爲蜀。宋改爲恭州。尋陞重慶府。元置路。明初。明玉珍號夏都。此明復改爲府。其地接魚復。聯夔道。背漢中。面夜郎。承三江之會。五溪雜聚焉。俗半楚風。剛悍尙武。人多姿態。銳氣善舞。信鬼勤穡。士習詩書尙儉素。領州三縣十七。

巴。江津。長壽。大足。永川。榮昌。綦江。南川。黔江。安居。璧山。合州。領銅梁。

定遠。忠州。領豐都。墊江。涪州。武隆。彭水。

夔州府。禹貢荆梁二州之地。天文軫翼分野。古庸國。魚復之地。春秋庸國。秦屬巴郡。漢置永寧郡。號曰帝城。又曰巴東。蜀漢曰固陵。梁改信州。唐改雲安郡。宋元曰夔州。明陞爲府。地據荆楚上游。當全蜀之口。鎮以灩澦。扼以瞿塘。憑高控深。咽喉楚蜀。土風拙樸。任俠尙氣。好遊如楚俗。火耕信鬼。領州一縣十一。

奉節。巫山。大昌。雲陽。大寧。萬。開。新寧。梁山。建始。達州。領東鄉。太平。

川南道。領府四。軍民府四。州五。餘皆文隸焉。不屬。

敘州府。禹貢天文如成都。古夔國。漢置犍爲郡。高縣。古夜郎國也。梁置戎州。及六同郡。唐爲戎州。改南溪郡。宋改敘州。取西戎卽敘而名。元爲路。明改爲府。其地東瀘水。西大峨。南通六詔。北接三榮。多產大木。風則夷夏雜居。士靜而文。民愿而樸。稍爲澆漓。亦習使然。領縣十。

宜賓。慶符。富順。南溪。長寧。高。筠連。興文。珙。隆昌。

馬湖府。禹貢梁州之域。天文鬼分野。亦古夔國。從古爲夷獠所居。漢武通之。始置郡。屬犍爲。改牂牁。唐改

馬湖。宋元因之。明爲府。其地雜戎瀘間。北走普資。地狹民稀。高峻水急。爲夷夏錯處之方。俗慤而鄙。信鬼不醫。領縣一。長官司四。

屏山。

萬歷中置縣

泥溪。

平夷。

蠻夷。

沐川。

嘉定州。禹貢天文同成都。漢爲蜀犍爲二郡地。晉因之。後爲平羌郡。唐爲嘉州。復爲犍爲郡。宋因之。尋爲嘉定府。又爲軍。元陞爲府。明更爲州。直隸布政司。其地負峨眉帶江。孤清挺秀。水陸要衝。人生秀雅。慕文學。民良俗樸。勤穡畏訟。領縣六。

峨眉。

洪雅。

夾江。

犍爲。

榮。

威遠。

鎮雄軍民府。禹貢天文同成都。古爲屈流大雄甸。昔烏蠻之裔。芒市居之。號芒部。明初仍芒部。嘉靖中平。會改鎮雄軍民府。其地綽忸左峙。磔砌右繞。雄峻險阻。遐荒僻地。俗愚悍信巫鬼。男耕女織。生業爲事。領長官司四。

歸化。

懷德。

威信。

安靖。

遵義府。禹貢天文如成都。秦爲夜郎。且蘭二縣地。漢屬牂牁。唐改郎州。曰播川郡。尋改播州。宋爲遵義軍。明初設播州宣慰使司。萬歷中。酋楊應龍作亂。平之。改遵義府。其地重山複嶺。四塞爲固。人直率。習射獵。信鬼佩刀。以漢服爲貴。領州一。縣四。安撫司一。長官司四。

遵義。梓桐。真安州。領綏陽。仁懷。

播州。白泥。容山。重安。四長官司。草塘安撫司。

東川軍民府。禹貢梁州之域。天文參分野。南詔蒙世隆置東川郡。地多夷。二種甚強。大曰棘人。曰羅羅。明平之。置東川軍民府。地控東川。據雲弄山川險阻。俗尙戰爭。居板屋。喜貿易。無所領。但示羈縻而已。

烏蒙軍民府。禹貢天文如成都。古夷獠地。漢通屬牂牁。唐烏蠻仲由牟之裔據焉。曰烏蒙部。歸明置軍民府。蜀最高地。山險荒陋。據索橋雪山之固。俗擊齒乃娶。去帽爲禮。剽急少文。

烏撒軍民府。禹貢天文如成都。古巴凡兀姑地。後名巴的甸。烏蠻久居之。宋烏夢據其地。號曰烏撒部。歸附明爲軍民府。地曲羊腸。險於劍閣。孟門之道。烏門篤僻。人跡罕至。俗婚不避親族。氣樸性率。尙巫不藥。荷氈被毳。非復華風。無所領。

龍安府。禹貢天文如成都。古氏羌地。漢陰平道。後魏置江油郡。改武平郡。分置龍門郡。唐爲龍門州。更正州。復江油郡。宋爲政州。元爲宣慰司。明初改龍州。尋陞爲龍安府。地連氏羌。雲棧險峭。四塞之邦。人務耕農。好射獵。岩居谷處。好道罕儒。椎髻披氈。佩刀劍。其市井有華夏風。領縣三。

平武。江油。石泉。

眉州。禹貢天文如成都。秦屬蜀郡。漢屬犍爲。齊置齊通郡。西魏改眉州。唐因之。後改通義郡。宋爲防禦州。元仍眉州。明因之。其地水突巖頤。灘穿龍爪。介峨岷。爲江山靈秀所聚。人尙名節。業詩書。重文獻。畏法無

訟領縣三。

彭山 丹稜 青神

邛州禹貢天文如成都。周職方氏屬雍。古臨邛地。梁置邛州。西魏改爲蒲原郡。宋元復爲邛州。明因之地。其沈黎印笮之間。雖介蠻夷。綽有華風。人慕文學。俗從儉約。領縣二。

大邑 蒲江

瀘州古巴國地。秦巴郡。漢犍爲。東漢置江陽郡。梁始名瀘州。治馬湖江口。唐仍之。宋宣和置節度。元復瀘州。隸重慶路。明仍瀘州。直隸布政司。南牂牁。北廣漢。肘江負山。邊鄙要地。多瘴。諸葛亮所謂五月渡瀘。此其源也。民樸俗約。知文學。樂耕稼。領縣三。

納溪 合江 江安

雅州禹貢梁州。周爲雍州之域。井鬼分野。秦置嚴道縣。晉置漢嘉郡。西魏改蒙山郡。後更雅州。唐因之。又改盧山郡。宋復雅州。元仍之。明亦仍之。其地四控夷落。羌水濱江。面面環繞。爲西蜀襟帶。南詔咽喉。俗樸畏訟。頗事詩書。領縣三。

名山 榮經 蘆山

永寧宣撫司。漢屬益州。唐改蘭州。宋因之。元改永寧路。明設宣撫司。其地環城皆山。疊翠如障。通滇連廣。俗雜夷風。領長官司一。九姓。

西陽宜撫司。古蠻夷地。秦通。屬黔中郡。漢西陽郡。復置武陵郡。吳改黔陽。唐改置思州。宋元叛服不常。明服之。爲宜撫司。文告轉達於重慶。其地當思南之要衝。接荆楚之邊境。人愿而樸。性安耕稼。領長官司一。

酉陽。

石柱宜撫司。古巴國地。秦屬黔中。漢曰牂牁。後周改置施州。唐爲清江郡。宋置石柱安撫使司。元及明皆因之。地連黔播。入荆湘。有便路焉。人性豪悍。無所領。

黎州安撫司。此梁州盡西境。天文鬼分野。古西南夷笮都地。漢通。名沈黎郡。後周改黎州。唐置漢源郡。宋元叛服不常。歸明置安撫司。萬歷中馬酋亂。討平之。降爲所。其城倚絕澗。南通六詔。西接吐蕃。爲全蜀西戶。俗多毡裘椎髻。城市漸染漢風。尙鬼神。博易以貨。無所領。

邑梅洞長官司。自禹貢以來如酉陽。元置邑梅軍民府。歸明降長官司。由重慶達布政司。其地折衝諸洞。襟帶五溪。夷漢雜處。

平茶洞長官司。禹貢荆梁分境。天文軫分野。戰國屬楚。漢屬武陵郡。宋置長官司。至明因之。爲酉陽外藩。有石耶之阻。路通荆楚。貨物稍饒。言侏儻。好捕獵。以火焙穀。取麻績布。以唱歌送喪葬。無所領。

天全六番招討使司。古蠻獠地。西魏改始陽郡。唐改爲靈關郡。宋曰和川。明改爲天全六番。設招討使。地接黎雅帶夷落。爲南詔咽喉。業耕種。男不工藝。女不紡績。以貨市易。無所領。

松潘指揮使司。禹貢梁州之域。天文鶩參分野。古氐羌地。漢置護羌校尉。屬河關郡。晉屬汶山郡。後周置。

龍涸郡。唐改松州。尋改交州郡。中陷吐蕃。至元始內附。爲松州。入明設松潘指揮使司。其地雪嶺之麓。南洮之濱。地勢險峻。控制西番。耕野壑。宿礪房。以木契交易。羊髈占卜。悍而善鬪。領千戶所一。安撫司四。長官司十七。

小河千戶所。八郎。麻布。阿角。芒者。四安撫司。占藏先結簇。蠟布簇。白馬簇。山洞簇。阿昔洞簇。北定簇。麥布簇。者多簇。牟力簇。斑斑簇。祈命簇。勒都簇。包藏簇。阿昔簇。思曩簇。阿角簇。潘幹簇。十七長官司。

建昌行都司。本西南夷。邛都國地。漢通。改越巂郡。隋改西寧郡。後改嚴州。唐置巂州都督府。又改越巂郡。懿宗時。詔蒙據其地。號建昌城。以烏白二蠻實之。元置建昌路。明初爲府。尋改衛。置行都司。領衛六。所八。俱兼軍民。長官司六。地據西南咽喉。爲邊陲形勝之地。山水清秀。田多膏腴。人重儒敬佛。殖貨通商。善造堅利。樸而近醇。於西蜀爲佳壤。云。南有瀘水。武侯城在焉。

建昌前衛。領禮州。中後。打衛。中前。四所。

昌州。瀘沽。刺村。三長官司。寧番衛。越巂衛。領鎮西。德昌。二所。邛部長官司。鹽井衛。領

馬刺長官司。會川衛。茂州衛。領疊州。威州。二所。長寧安撫司。長寧長官司。

疊溪。守禦千戶所。禹貢梁州之域。天文觜參分野。古氏羌地。漢初通。置蠶陵郡。唐改翼州。入明爲疊溪。設守禦千戶所。直隸省會。其地犂牛左峙。汶江右環。勢阻荒僻。俗漸聲教。習尙衣冠。性雖驕獷。頗慕華風。領

長官司二。

疊溪。鬱郎。

廣東省。

廣東古百粵地。五嶺之外爲樂土。北負雄連以制荆吳。東肩惠潮以制閩越。內關高廉以控交桂。外藩雷瓊以扼黎夷。而形勝寓焉。廣州其大都會也。南雄萬山三水。控帶羣蠻。而兵餉傳郵。仰其權利。惠州提封廣袤。悍客礦徒。久費收戢。潮州沃野廣原。昔稱阜裕。往獨患輦戶斗老。萬歷來內寇外夷。爲害孔棘。肇慶據上游。當嶺西孔道。瀧水地界梧藤。盜賊淵藪。高州海澳。獠獮終明之世。時聞弗靖。廉州山水雄奧。爲海北要區。雷州炎微。多平田腴壤。但爲亡命逋逃之地。瓊州並海。而五指腹心之邦。反爲黎穴。則交趾之棄。可爲浩歎。乃濱海島夷之國。數十種。時時出沒。志在貿易。非必盜邊也。顧民逐山海鑛冶。番舶之利。不勸農田。甚者椎剽海上。桴鼓之警。彌滿山谷。良民困於徵求。蓋政教不修。而大兵數舉之過也。且密邇蒼梧。征南幕府在焉。軍旅之興。殆無寧歲。况地有珠池。番貨駢集。本民用所資。而內使頻行采辦。擾害閭左。終明之世。不有以恤之。而民滋病。故外負富饒之名。而中多耗患者。此地是也。初三戶六十七萬五千五百九十九。人口三百萬七千九百三十二。末年戶五十三萬七百一十二。人口二百四萬六百五十五。設廣東承宣布政使司。分道五。領府十。州八。縣七十五。嶺南道。領府三。

廣州府。禹貢揚州之南境。天文牛女分野。諸郡皆然。春秋爲南越地。舊稱羊城。秦置南海郡。秦亂。尉趙佗

據其地自王漢武帝平之復南海郡屬交州刺史東漢遷交州治番禺三國吳遷治龍編以番禺置廣州梁陳並置都督府隋置總管府復爲南海郡唐爲廣州改南海郡唐末置清海軍節度宋爲廣州清海軍元置廣州路明改爲府地總百粵山連五嶺連峯隔其陰巨海瀦其陽沃衍數千里南海大都會也室皆塗墍家重耕農俗雜五方人物富庶性和而不爭商賈阜通得華風之雅所以士多儒術領州一縣十五南海番禺順德東莞從化龍門新寧增城香山新會三水清遠連州領陽山連山新安

韶州府漢平南粵置曲江湏陽二縣隸桂陽郡統於荊州東漢始置都尉孫吳置始興郡治曲江劉宋改廣興郡陳霸先起於此隋廢郡屬廣州唐置番州尋改東衡州又改韶州已復爲始興郡五代屬南漢宋復韶州屬廣南東路元爲路明改府地形險峭唇齒江湘咽喉交廣爲南粵北門習俗醇樸不事遊宴領縣六

曲江 樂昌 仁化 乳源 翁源 英德

南雄府戰國屬楚秦屬南海郡漢屬桂陽孫吳屬始興郡南漢置雄州治保昌宋凌皓知保昌興水利導江民感其德號西凌江宣和中置保昌郡元改置南雄路明改府地爲百粵羣蠻之襟會人性稍剛俗雜夷夏無技巧鮮厚資領縣二

保昌 始興

嶺西道領府二

肇慶府。漢屬蒼梧郡。半分屬合浦郡。劉宋置綏建郡。治四會。梁降置高要縣。隋爲端州。唐改潯州。又改高要郡。尋復端州。宋置興慶軍節度。後陞爲肇興府。改肇慶軍。元爲路。明改爲府。其地三江雄據。阻山瀕海。具山麓勝概。爲五州之要區。土厚民醇。夷獠雜處。漢人亦尙文雅。而山谷多椎髻跣足之民。領州一縣十高要。四會。新興。陽江。陽春。高明。恩平。廣寧。德慶州。領封川。開建。

高州府。秦大約皆南海。漢置高涼縣。孫吳置高涼郡。晉分置高興郡。唐爲高州。復高涼郡。治電白。五代屬南漢。宋徙治茂名。元改路。明爲府。其地居兩廣之間。土厚山環。有三水以流其惡。高而少涼。瘴癘特少。俗多禮讓。尙衣冠儉約。好鬼。領州一縣五。

茂名。電白。信宜。化州。領吳川。石城。

嶺東道領府二

惠州府。梁置梁化郡。隋改循州。唐以循州屬嶺南道。改置海豐郡。宋改爲惠州。後爲博羅郡。元爲惠州路。明改府。其地東接梅潮。西連汀贛。漢之名部。粵之沃野。俗信鬼好祀。文物豐美。婦女爲市。男坐於家。不檢之風。大同諸郡。領縣十。

歸善。博羅。長寧。永安。海豐。河源。龍川。長樂。興寧。和平。

潮州府。天文牽牛分野。漢南海郡地。晉分立義安郡。梁改瀛州。隋始置潮州。治海陽。唐因之。又爲潮陽郡。

五代屬南漢。宋仍潮州。元爲路。明爲府。地瀕海。爲閩廣兩粵之界。自韓愈至潮。而後士篤儒行。後漸爲文物之邦。領縣十。

海陽。潮陽。揭陽。程鄉。饒平。惠來。大浦。澄海。普寧。平遠。

海北道領府二。

雷州府。秦象郡地。漢爲徐聞。屬合浦郡。梁分合浦置合州。隋仍之。唐改雷州。改海康郡。尋復雷州。五代屬南漢。宋隸廣南西路。元置雷州路。明改府。其地窮服嶺南。海山環抱。多平田沃壤。旁通閩浙。士頗向學。俗樸雜黎俗。氣甚熱。領縣三。

海康。遂溪。徐聞。

廉州府。古南粵地。天文翼軫分野。秦屬象郡。漢改合浦郡。孫吳改珠官郡。劉宋置越州。隋改祿州。又爲合浦郡。唐復越州。後改廉州。又復合浦。宋徙州治長沙。改置太平軍。元置廉州路。明改府。其地爲南轅窮途。瀕海作郡。鑿山爲城。人情儉樸。畏訟。郡無耕稼。所資珠璣。百物走集。領州一。縣二。

合浦。欽州。領靈山。

海南道領府一州一。

瓊州府。古南粵地。牛女分野。漢武帝平南粵。置珠崖儋耳二郡。後併入珠崖。元帝又罷之。東漢爲縣。隸合浦。唐置崖儋振等州。後增置瓊州。後改瓊山郡。五代屬南漢。宋仍瓊州。大觀初置靖海軍節度。尋廢。元改

瓊州路。明改爲府。郡居海島中。南望連山。有無繚緲。四川一島。中盤黎峒。前瞰清河。多高山大林。廣袤千有餘里。人性坦質。有衣冠禮樂之風。士多文雅。儉素畏法。領州三縣十。

瓊山。澄邁。臨高。安定。文昌。樂會。會同。儋州。領昌化。萬州。領陵水。崖州。領感恩。

羅定州。禹貢揚州之南境。天文牛女分野。古百粵。漢更端溪郡。晉改龍鄉。梁改置瀧川郡。隋曰瀧水。唐改置開陽郡。宋改康州。元仍之。明初改瀧水縣。屬肇慶府。萬曆中陞爲羅定州。其地重崗激灘。控扼要衝。男務魚獵。女勤紡績。侗愿安靜。亦樂土也。領縣二。

東安。西寧。

廣西省。

廣西爲荆揚西南郵。亦古百粵地。東南接廣東。而風壤氣習特異。山特起而峻。水清湍而駛。地利物產。優贍自給。桂林其都會也。蒼梧地總百粵。雄據南極。爲水陸之衝。明設文武大臣於此。下爲無見。府江左江右江貫絡諸郡。縣地甚遠。而苗夷附據爲寇竊。不但古田荔波數縣。苦其蠶食而已。潯州大藤峽。跨黔鬱二江之間。爲諸蠻窟穴。伺間出剽。急乃投竄。雖有上隆州五屯所扼其咽喉。然不足制也。若與安西延六峒。與楚之武岡陽岡接壤。獠據之。爲桂林北境害。至柳慶以西。則入寨爲盜區。洛容懷遠。每罹慘毒。而賓州其襟喉矣。右江一帶。惟岑氏最強。思田殘破之餘。萌孽時作。削土分官。策亦良矣。南寧太平。控遏兩江。坐躡交趾。桂筦保障。於焉藉之。總之三面倚楚。西接滇中。亦形勝之區也。初年戶二十一萬一千二百六

十三。人口一百四十八萬二千六百七十一。末年戶二十一萬八千七百一十二。人口一百一十八萬六千一百七十九。設廣西承宣布政使司。分道四。領府十。軍民府一。州十一。土州三十六。縣五十有三。長官司四。

桂平道領府二。

桂林府。禹貢荊州之域。天文翼軫分野。秦桂林郡。漢分屬零陵蒼梧二郡。孫吳置始安郡。屬荊州。晉屬廣州。劉宋改始建國。南齊復始安郡。梁兼置桂州。唐因之。尋改建陵郡。陸靜江軍節度。五代屬南漢。宋仍桂州。南宋爲靜江府。元改路。明爲桂林府。夫五管之地。桂爲大。被山帶江。東控嶺海。右扼蠻荒。山特起不聯。秀麗甲天下。自荔浦以北爲楚。以南爲粵。有中州清淑之氣。士知經術。全州冠裳特盛。民樂樵漁。風氣樸古。領州二。縣七。

臨桂。興安。靈川。陽朔。永寧州。領永福。義寧。全州。領灌陽。

平樂府。禹貢天文。漢以上同桂林。吳置平樂縣。屬始安郡。隋廢郡。以其地屬桂州。唐置樂州。改昭州。後改平樂郡。五代屬南漢。宋復昭州。元改平樂府。明因之。居蒼梧始安之間。與清湘九疑犬牙相入。自靜江至梧。灘瀧甚多。至昭而分。上不甚險。下多銳石。灘高水激。爲嶺表吭地。士知學。居多巢檜。尙樸。以難占。領州一。縣七。

平樂。恭城。富川。賀。昭平。荔浦。修仁。永安州。無所領。

左江道領府三

南寧府禹貢揚州裔壤。天文翼分野。秦屬桂林。漢鬱林郡之領方縣。晉分置晉興郡。唐置南晉州。尋改邕州。天寶初改朗寧郡。後復邕州。置建武軍節度。宋仍邕州。改永寧軍。元改南寧路。明爲府。其地內制廣原。外控交趾。襟帶九洞。脣齒列城。地勢險阻。人性輕悍。商賈叢集。民物茂康。重鬼輕醫。宋狄青破儂智高。留襄漢子弟鎮之。故其間多襄漢人。言語頗同。領州三。縣三。設有南寧所。領土州四。

宣化 新寧州 領隆安 橫州 領永淳 上思州 無所領 歸德州 果化州 忠州 下雷州

潯州府漢以上同南寧。晉分置桂平郡。隋廢郡爲縣。唐始置潯州。已改潯江郡。宋省。尋復置。元改潯州路。明爲府。左黔右鬱。合於山之麓。曰潯水。封域廣袤。江山奇偉。民樸訟簡。俗服禮儀。領州一。縣三。

桂平 平南 貴 武靖州 官岑 姓世

太平府古南粵地。漢屬交趾郡。晉以來夷獠居之。唐隸邕州都督府。宋平嶺南。於左右二江溪。峒立五寨。曰太平。與古萬。遷隆。永平。橫山。四寨。各領州縣。屬建武軍節度。元置太平路。明爲府。壤連交趾。峻嶺盤互。長江環之。俗醇樸不華。衣冠不正。飲食亦殊。領州二。縣二。轄土州十四。土縣二。

崇善 養利州 無領 左州 領永康 太平州 官李 姓 思城州 官趙 姓 安平州 官李 姓 萬承州 官許 姓 上下凍州 官趙 姓

鎮遠州 官趙 姓 都結州 官儂 姓 全茗州 官李 姓 茗盈州 官李 姓 思同州 官黃 姓 龍英州 官李 姓 結安州 官張 姓 結倫州 官馮 姓

思明州。官黃羅陽縣。官黃陀陵縣。官黃

蒼梧道領府一。

梧州府。禹貢荊州之域。天文牛女分野。秦屬桂林。漢武帝爲廣信縣。置蒼梧郡。元封中。徙交州治之。隋廢郡爲縣。屬封州。唐屬靜州。尋置梧州。後改蒼梧郡。五代屬南漢。宋仍梧州。元改路。明爲府。地總百粵。山連五嶺。襟帶湖湘。背倚原阜。爲南極水陸之衝。俗力田務。本好學。剛悍信直。樂音閒美。領州一。縣九。

蒼梧。藤。容。岑溪。懷集。鬱林州。領博白。北流。陸川。興業。

右江道領府四。軍民府一。

柳州府。古百粵地。翼軫分野。秦屬桂林。漢屬鬱林。孫吳復屬桂林。後析置馬平郡。梁兼置龍州。隋徙治龍江北。尋廢。以馬平縣置象州。唐改昆州。尋加南昆州。貞觀中始改柳州。後更龍城郡。後爲楚馬氏所據。五代屬南漢。宋仍柳州。元置路。明改爲府。地多奇石。平地突起數百尺。鎮壓諸蠻。爲越駱都會。俗醇古。絃誦爲嶺南最。不事蠶作。儉樸有節。領州二。縣十。

馬平。雒容。羅城。柳城。懷遠。融。來賓。象州。領武宣。賓州。領遷江。上林。

慶遠府。秦象郡。漢交趾日南二郡界地。後淪於蠻。唐始置粵州。改宜州。治龍水縣。後改龍水郡。五代時爲楚馬氏所有。後屬南漢。宋復宜州。宣和中置慶遠軍節度。後改慶遠府。元爲路。明仍府。控扼蠻夷。置守戍。

爲嶺南要害。人風獷戾。居民頗馴。仗義而樸。領州一。縣四。土州三。縣一。長官司二。

宜山。天河。河池州。領思恩。荔波。

南丹州。官莫東蘭州。官章那地州。官羅忻城縣。官莫永順。永定。二長官司。

姓那地州。官羅忻城縣。官莫

鎮安府。古百粵。漢屬交趾郡。唐隸邕州。宋於鎮安洞建宣撫司。元改路。明移於廢凍州。爲鎮安府。其地高峯峻嶺。人跡稀至。官岑姓人多梗執。情義乖疏。男女無嫌別。亦無所領。

思明府。古百粵地。漢屬交趾郡。唐置思明州。宋元因之。明爲府。其地江山雄峻。映帶左右。人畏法蓬跣。土官黃姓。領州三。縣一。先有祿州。西平州。忠州。俱淪入安南。

思明縣。上石西州。下石西州。官開憑祥州。官李

思恩軍民府。古百粵地。漢屬交趾郡。唐置思恩州。隸邕州都督。宋屬邕州。元隸田州路。明改思恩軍民府。

領縣一。

武緣。

直隸布政使司。州十一。縣三。長官司二。皆漢交趾郡地。

田州。宋始置田州。前皆郡州內地。明初改府。嘉靖初降爲州。其地平曠。包鎮安。控百粵。俗陋野。禮義粗疏。惟耕織皆華風。官岑姓。領縣一。

上林。官姓黃。

歸順州。先隸田州府。田州降則直隸布政司。風土同田州。官岑姓。無所領。

利州。漢置。屬交趾郡。宋元因之。入明仍利州。其地羣山拔秀。濛泓環流。刀耕火種。種異俗分。大約樸獷。無所領。

奉議州。漢以後俱屬交趾郡。宋始置州。明因之。其地旁右江。倚石門。山水明秀。俗愿而勤。耕種紡績。男青布。山女戴竹笠。無所領。

向武州。宋置。明因之。官黃姓。其地龍盤虎踞。形勝天成。人物粗疏。病無醫藥。以檳榔爲禮。領縣一。富勞。

都康州。宋置。明因之。官馮姓。地深江險。無儀文。人狡悍。

龍州。宋置。明因之。其地控制南交。藩屏中夏。設守戍焉。民愚而信鬼。畏法混雜。

江州。宋置。明因之。其地平原曠野。山水外環。其俗好鬼無醫。惟務耕農。不知商賈。官黃姓。領縣一。

羅白。官梁姓。

思陵州。宋置。明因之。其地羣峯疊翠。二水交流。數歲婚嫁無別嫌。性悍直。

都祥州。與都康不異。

上林長官司。宋置上林峒。明立長官司。其地累峯據前。倉冒峙後。巖穴深冥。人跡罕至。俗赤脚蓬首。衣白頂笠。父子各居。男女混雜。

安隆長官司。統於慶遠府而不屬。永樂中始置。地方雜夷漢。稟性各異。逐石爲居。男女不別。婚以早爲佳。

明書卷四十三

志二

方域志五

雲南省

雲南古梁州裔境也。崇岡巖巖。激澗濼紆。金碧米鹽之產。號稱精贍。而雲南一都會也。諸郡大半皆沃壤。獨元安路納安南。金騰地湧諸甸。瀾滄聯絡寧麗。曲靖彈壓烏蠻。王公設險於斯。要矣。若武會大者。元江。武定。景東。麗江。小者姚安。北勝。鄧川。霑益。並以兵力稱桀。而滇境粗安。則沐氏世有勞焉。尋甸上下。風土絕異。兵衛漸疏。故諸羅構釁相將。而木邦孟密不聞悔禍。終明之世。搶攘時作。則撫綏之失策也。其東境則曲靖之牂牁江。達廣東。西境則北勝之金沙江。達四川。其北境則陸行關索嶺。達貴陽。稍有兵警。坐令梗絕大都。滇南城郭人民。夷居十八。緩則蜂蟻屯聚。急則豕突鷓張。號令不行。勦誅不易。是以二百餘年。但示羈縻文告。夷性難馴。古昔然矣。初年戶五萬九千五百七十六。人口二十五萬九千二百七十。末年戶一十三萬五千五百六十。人口一百四十七萬六千六百九十二。繁滋獨多。設雲南承宣布政使司。分道四。領府十四。軍民府八。州四十一。縣三十一。設都司。領衛二十一。守禦所十三。安撫司三。宣慰司九。宣

撫司三長官司二十四。

安普道領府一軍民府二。

雲南府禹貢梁州邊徼。天文井鬼分野。古西南夷爨鳩鳥獠所居地。其地有滇池。周廣五百里。合盤龍江黃龍溪諸水匯爲池。亦曰昆明池。楚莊躡略地至滇池。因自王其地。秦頗置吏焉。漢武欲伐滇。於長安西南穿昆明池象之。習水戰。竟降滇。遂置益州郡。蜀漢改建寧郡。又分置雲南郡。晉宋齊因之。隋置昆州。唐因之。後爲南詔蒙氏所據。改善闡府。歷鄭趙楊段氏。至高智昇世有其地。元得之。改置中慶路。入明改雲南府。東距爨東南屬交趾。西抵伽佗。北接吐蕃。東北際黔巫。爲西南要地。種類非一。大約性勇健。不鞍而騎。勤耕尙訟。俗鮮禮義。死不葬。祭敬佛。椎髻編髮。惟城邑之間。少有華風。領州四縣九。

昆明 富民 宜良 嵩明州無所領 晉寧州 領歸化 呈貢 安寧州 領羅次 祿豐 昆陽州

三泊 易門

曲靖軍民府禹貢天文大約同雲南。漢夜郎味縣地。蜀漢置建寧郡。後分置興古郡。治律高。晉屬寧州。後爲西爨地。隋置恭協等州。唐置南寧。後改恭州。又爲曲州。分協州置靖州。後沒於南詔大理段氏磨彌部。元改爲曲靖路。後爲宣慰司。入明改軍民府。其地負山據江。四達要會。俗椎髻皮服。力耕好鬪。地富饒。寡廉恥。領州四縣二。

南寧 亦佐 霑益州俱無所領 陸涼州 馬龍州 羅平州

尋甸軍民府。古滇國地。昔爨刺蠻居此。後烏蠻新丁奪之。及蒙氏有之。曰尋甸。又爲益源部。又爲仁德部。元置仁德萬戶府。入明爲尋甸軍民府。其地川原平行。山顧水瀠。俗則婦襲夫職。露頂爲禮。俗狠而鄙。變詐無忌。無所領。

臨沅道領府四軍民府一。

臨安府。古句町國。漢屬牂牁郡。唐南詔蒙氏置通海郡。宋段氏曰秀山。其後屬善闡。又屬阿楚。元收附。改爲阿楚。後置臨安路。屬宣慰司。入明改爲臨安府。其地北激江西。雄楚爲滇中上閩。邊徼重地。士性質野。民性愚傲。採獵爲業。多積爲富。領州四。縣四。長官司九。

建水州。石屏州。阿迷州。寧州。領通海。河西。嶧峨。蒙自。長官司九。曰納樓。教化。王弄。虧容甸。溪處甸。思陀甸。左能寨。落恐部。安南。

激江府。古西南夷。漢通立俞元縣。屬益州。蜀漢屬建寧郡。梁屬南寧州。隋屬昆州。蒙氏曰河陽。元得之。置激江路。明改爲激江府。其地崎嶇崖石。地鮮平夷。有山川之勝。性質野。好爭訟。衣食耕桑。民稱饒裕。領州二。縣三。

河陽。江川。陽宗。新興州。路南州。

廣南府。宋始稱特磨道。儂氏居之。元立廣南宣撫司。入明改廣南府。山崖高險。金城之固。習儉約。事耕耘。有蠱及瘴。謔訟好鬪。俗雜夷夏。領州一。

富州

廣西府古滇國東南境入漢爲益州後屬牂牁郡東漢屬興古州晉屬寧州唐爲東蠻烏蠻諸郡所有後爲羈縻州隸黔州後爲南詔蒙氏所有元內附置廣西路明改爲府其地東瞰廣西南距交趾地幽阻有蠻四種曰黑蠻曰僂曰土獫曰白子人性悍質頗稱富強領州三

師宗州 彌勒州 維摩州

元江軍民府古西南夷極邊之境唐時南詔屬銀生節度宋儂黨竄此元內附置元江萬戶府入明改軍民府領長官司一

因遠羅必甸長官司

洱海道領府五軍民府二

楚雄府禹貢梁州之域天文井鬼分野戰國屬楚漢屬益州郡晉置安州尋罷入寧州唐分置旁望邱覽等州後沒於南詔再淪於蠻元內附立威楚萬戶府後改路置宣撫司入明改楚雄府其地山川秀麗壤土肥沃有鹽井之饒南臨金齒北距羅婺東連昆吾諸郡西走大理大約與漢僂同風領州二縣五

楚雄 定遠 廣通 定邊 磔嘉 南安州 鎮南州

蒙化府漢初通爲益州郡地唐屬姚州自蒙氏細奴邏築城號蒙舍詔永泰初改曰陽瓜元更蒙化路入明爲府其地四山如環堵襟帶蒼洱控制南澗諸蠻俗勤耕稼喜射獵富饒淫侈領州一

雲州

永寧府古名樓頭賧地接吐蕃又名答藍唐屬蒙氏宋屬段氏元得之改永寧州明爲府其山川險阻人勇厲樸野衣重氈好戰鬥領長官司四

刺次 革甸 香羅 瓦魯

順寧府本蒲蠻之地號慶甸南詔屬銀生府宋以前不通中國元始內附置順寧府明因之地扼諸蠻人多惡陋不知華風但屈膝爲禮領長官司一

祿谷

景東府古徼外荒遠之地號柘南又云南榻唐蒙氏立銀生府元始討平置開南州附明改景東府地近緬僥民多百夷田皆稂不通漢書祇用緬字無所領

姚安軍民府本滇國地漢通之置弄棟縣屬益州蜀漢屬雲南郡唐置姚州後淪於蒙氏段氏元討平置姚安州入明爲軍民府其地崇山修谷中多平疇田頗膏腴習俗愚野勇悍好鬪敬釋勤穡領州一縣一

姚州 大姚

武定軍民府禹貢梁州之界天文井鬼分野古烏蠻羅婺部地漢屬益州隋屬昆州唐屬戎州元內附置羅婺萬戶府尋改武定路入明更軍民府其地四圍千里削壁懸崖密箐深阻人多好浴男女混而不恥叛服不常領州二縣一

和曲州領元謀。祿勸州無所領。

金滄道領府一軍民府三州二。

大理府古昆彌國春秋楚有之後爲夷漢通置舊州屬益州三國蜀漢爲葉榆郡晉屬寧州宋梁陳置永昌郡唐初爲葉榆縣後置姚州都督府於此其後蠻蒙舍詔皮羅閣并蒙嶠越析浪穹澄睽浪施五詔合爲一號南詔治大和城尋號大蒙國後徙羊苴咩城今府治也更號大理國元收附改大理路明改爲府高山深阻地廣雄富爲南詔都會俗本於漢民多士類知詩書谷多夷人各爲習領州四縣三長官司一太和趙州領雲南鄧川州領浪穹賓川州雲龍州大理長官司

永昌軍民府古哀牢國漢武通置不韋縣東漢置瀾滄郡改永昌郡蜀漢及晉爲永昌府唐屬姚州都督府後沒於蠻宋高氏據其地元討平置金齒宣撫入明初爲金齒衛後改永昌府加軍民其地山谷險惡俗以金裹兩齒繡面好兵務獵惟諸葛營城皆漢人衣冠禮義悉如華夏領州二縣二長官司二保山永平騰越州騰衝州領鳳溪施甸二長官司

鶴慶軍民府舊爲越析詔之地漢通爲鶴川東漢屬永昌郡後陷於夷元內附置鶴州尋陞爲鶴慶府入明爲軍民府其地蠻嶂明秀川源深窅人氣蠢樸好剛健訟帶弓矢能鑄佳劍領州二

劍川州順州

麗江軍民府漢通置定笮縣分屬越嶲益州二郡東漢屬永昌郡隋屬舊州唐沒於蠻爲越析詔地元收

附。改麗江路。入明爲軍民府。官本姓。其地雪山門峙。麗江環繞。橫連千里。雄據九賸。衣同漢制。而好五采。或錦或布。皆番大花。冠亦五色。善射獵。勇厲。好飲酒。雄富多積。信釋用肉刑。領州四。

通安州。巨津州。寶山州。蘭州。

北勝州。古白國。唐南詔異牟尋開其地。名北方賸。徙瀾河白蠻及羅落麼步諸蠻實其地。號劍羌城。元內附。置北勝府。明降爲州。外江內關。險固莫攻。氣樸陋。勤耕織。巢穴居者多。人甚勇厲。直隸布政司統於金滄道。

新化州。舊爲馬龍他郎二甸地。後人阿剌諸部蠻所居。元始內附。曰新化州。明因之。其地羣山夾江。勢扼蒲刺。婦事耕桑。男多逸豫。墾山爲田。椎魯不文。直隸布政府統於臨沉道。

者樂甸。長官司。漢以前爲荒徼。唐屬馬龍他郎二甸。爲猛摩夷。號者烏。元內附。仍者烏。隸元江路。明初置者樂甸。長官司。其地荒野。山水粗猛。俗獷樸。爲市旦則婦女。日中則男。衣冠皆不類華夏。直隸布政司統於洱海道。

直隸都司衛一府二州五宣慰司五宣撫司三。

瀾滄衛。漢始開通之。按史初開博南行者愁怨作歌。所謂漢德廣。開不賓。度博南。越瀾津。渡瀾滄。爲他人。卽此地。元內附。置司屬北勝州。後省司爲北勝地。入明立衛。山勢陡絕。在麗江之東。人多勇獷。尙爭喜獵。領州一。

浪渠州

孟定府古蠻夷地。舊名景麻。元內附。置孟定路。明改爲府。地荒野。男戴竹笠。女多衣文綉。淫瀆不檢。領司一曰孟定安撫司。

孟良府古孟措蠻地。從古不通中國。入明始內附。置孟良府。地近木邦。俗略同。夷風未變。無所領。威遠州南詔屬銀生府。舊爲濮落蠻所居。元內附。置威遠州。明因之。地多山。男女勇捷。走險如飛。蓬首跣足。貴者裹巾幘。衣花布。無所領。

灣甸州舊爲細賤蠻地。元內附。屬鎮康路。明爲州。地多山。男倭質。女貴者以象牙作筒貫於髻。飾金鳳頂。絡以金。俗淫而無恥。

鎮康州舊石賤蠻地。本里楚所居。元內附。立鎮康府。明改爲州。地山險荒僻。民跣足。走荆棘如飛。病專祀鬼神。樸野獷悍。

大候州爲孟祐白蠻所居。元內附。曰大候州。屬麓川路。明仍州。直隸都司。地荒而多山。俗不通華風。騰衝軍民指揮使司。漢初通爲永昌郡。西鄙古越賤地。元討平。置騰衝府。入明改司。其地控扼百夷。通達要害。獨此蠻性懦弱。善孳畜佃種。巢居火種。

車里軍民宣慰使司。古車里蠻地。後倭泥貉獫狁黑角雜居之。自古不通中國。元討通。置徹里路。入明改府。後改司。境倚浪滄江。近接交趾。民皆百夷性頗馴。人額皆刺一旗爲號。

木邦軍民宣慰使司。舊爲孟都蠻地。漢通爲孟邦。後多叛。元置木邦路。明改司。地山險。男貴女賤。文身髡髮。摘鬚修眉。性馴。

緬甸軍民宣慰使司。古西南夷。其地舊有江頭、太公、馬來、安正國、蒲甘。緬王五城。元內附。置邦牙軍。明改司。其地頗平沃。性柔而詐。事佛敬僧。有城郭室廬舟楫。器頗精巧。自有緬字。

八百大甸軍民宣慰使司。世傳土酋有妻八百。各領一寨。曰八百媳婦。元征之。道不通而還。明穎公友德拓得之。立司。地險峻。民愚野。把手爲禮。事佛。刺花眉間。

老撾軍民宣慰使司。古越裳氏地。俗呼曰撾家。漢武通之不附。至永樂三年始服。貢方物。乃置司。地阻扼。人性獷悍。文身刺眉花。多建高樓居之。

太古刺宣慰使司。

底馬撒宣慰使司。二司皆近木邦。其沿革風土皆同。

南甸宣撫司。本西南夷。宋通。置南甸州。元因之。明改司。其地廣大。據南牙石梯之險。人性悍勁。重婚禮。

千崖宣撫司。舊爲千賴賤地。棘夷居。元始通。置鎮西路。明爲司。其地有雲晃山河。四時皆蠶。能織縣布。

隴川宣撫司。舊爲麓川地。皆棘夷所居。元通。置麓川路。入明初爲麓川平緬軍民宣慰使司。正統間。思任

發反。平之。降稱宣撫司。治龍把地。多山谷。人性狡悍。

猛密安撫司。舊隸木邦。萬歷中直隸布政司。風同木邦。

紐兀長官司。舊爲也兀蠻居。明始內附立司。地山僻。人居野無禮。

芒市長官司。舊爲怒謀蠻及大枯賸小枯賸之地。唐史所謂茫施蠻也。入明置司。其險荒。男衣繒。女衣皮。無禮義。

孟璉長官司。茶山長官司。麻里長官司。三司皆永樂末年置。皆極荒夷落。俗皆夷習。無文字禮義。

貴州省。

貴州禹貢荆梁二州之南徼。古鬼方地。後爲西南夷羅施國。俗頗近滇南。而山箐峭深。水無瀦澤。土無貨。置貧瘠至極。官戎歲費。仰給他省。加以兵荒。匱乏弗繼。况省城會區。咫尺夷土。故泗城恣其狼吞。伺竊門戶。則守在永寧。芒部盤踞廣土。蹲伏北藩。則憂先畢節。若思南石阡銅仁諸郡。界在鎮筸。曾播夷峒之間。地雜川烏諸部。師旅繹騷。與楚蜀同其災害。且水西普安凱里諸酋。久擁雄富。性復剛豪。地連肘腋。奪職爭疆。迄無寧日。終明之世。宦苦投荒。而夷性佳兵好殺。恒勤師伐。得不償夫。羈縻無術。然不能爲他境患。亦其習俗然也。明初分隸四川湖廣雲南。永樂十一年。因田酋倡亂。屢拒朝命。誅討旣行。始建省設官。郡縣其地。弘治中。始覈戶口。上之司農。計戶四萬三千三百六十七。人口二十五萬八千六百九十三。末年戶四萬三千四百五。人口二十九萬九百七十二。設貴州承宣布政使司。分道五。領府八。州六。縣七。軍民指揮使司二。宣慰司一。安撫司一。長官司八十一。

貴寧道。領府一。宣慰司一。安撫司一。

貴陽府。禹貢荆梁二州之南境。天文參井分野。本西南夷羅施國地。漢武通屬牂牁郡。後淪於夷。宋始置大萬谷樂總管府。元改順元路。隸湖廣。明初設宣慰司。成化中建程蕃府。隆慶中更定爲貴陽府。其地東阻五溪。西距盤江。爲滇南門戶。昔本苗獠雜居。自然省會。儒教漸興。累登仕籍。漢夷異俗。漢仍衣冠。夷皆被氍衫。爲禮。領州二。縣二。安撫司一。長官司十七。

新貴。貴定。定番州。廣順州。金筑安撫司。領麻嚮。木瓜。大華。貴竹。程番。韋番。

洪番。方番。臥龍番。金石番。小龍。羅番。大龍。小程。上馬橋。盧番。平伐各長官司。

貴州宣慰司。古西南夷八番鴨水之地。漢爲羅甸國。元內附。屬順元。隸湖廣。明改貴州。置宣慰司。其地山廣林幽。重岡盤曲。寨多夷種。人慕漢風。吉凶之禮。頗效中華。領長官司九。

水東。中曹。青山。劄佐。龍里。白納。底寨。乖西。養龍。

思石道。領府四。

思州府。古台蓬野鷄之地。秦屬黔中郡。漢屬武陵郡。唐改思州。後改寧夷郡。宋元未附。明初置宣慰司。永樂中改府。其地重山環抱。沃壤中平。西南雄鎮也。民性剛悍。外癡內黠。刻木爲契。祭鬼弭災。後濡聲教。丕變冠裳。領長官司四。

都坪。都素。黃道。施溪。

思南府。禹貢荊州荒裔。春秋戰國屬楚。秦屬黔中。漢屬武陵。隋改務州郡。唐改務州。尋爲思州府。宋爲州。

元爲路。明改思南府。其地峰秀川縈。爲牂牁要地。控夷咽喉。蠻獠雜居。衣冠言語各異。尙樸力穡。擊鼓迎客。歌唱耕種。領縣三。長官司四。

安化。

婺川。

印江。

以上縣。

水德。

蠻夷。

朗溪。

沿河。

祐溪。

四長官司。

石阡府。唐通曰夷州。後改義泉郡。宋元爲長官司。明改石阡府。其地山水環繞。迴通鎮遠。遠距思南。黔中要地。俗不事文墨。男女跣足。好鬼性剛。領縣一。長官司三。

龍泉縣。

石阡。

苗民。

葛彰。

三長官司。

銅仁府。禹貢荊州南荒。天文星分野。古爲溪蠻地。元內附。置銅仁長官司。明改府。其地高巖萃嶽。窮谷幽渺。苗夷雜處。漢士頗知禮義。而犵狁勇譎。峒夷狡黠。苗人剛狠。久難變也。領縣一。長官司六。

銅仁縣。

提溪。

烏羅。

省溪。

大萬。

平頭。

銅仁。

各長官司。

都清道。領府三。

鎮遠府。舊爲大田峒。元始置鎮遠府。明因之。其地鎖鑰黔楚。水陸要衝。習俗質樸。服用儉約。以蔴灰爲鹽。領縣二。長官司三。

鎮遠。

施秉。

二縣。

金容。

偏橋。

邛水。

三長官司。

黎平府。古荊州荒徼。天文軫餘氣。漢屬牂牁。五代時田氏據之。元討平。置潭溪長官司。明改府。山溪險峻。

夷落領緣。性兇頑。言鳩舌。好鬼無文。領縣一。長官司十三。

永從縣。西山。洪州。潭溪。八舟。古州。湖耳。亮寨。曹滴。毆陽。新化。中林。赤溪。

龍里各長官司。

都勻府。古西南夷。元始內附。置都雲安撫司。入明改都勻府。其地壤僻而險。匪通遠。人罕到。習俗鄙陋。人皆戴笠。勇於戰鬥。領州二。縣一。長官司八。

麻哈州。獨山州。清平縣。都勻。邦水。樂平。合江。平洲。平浪。平定。豐寧。各長官司。

新鎮道領府一州一。

平越府。古黎峨里。歷代叛服不常。明初置平越衛。萬歷中。播酋楊應龍反。平之。革土官。郡縣其地。陞平越府。其地山溪險峻。蠻苗叢居。爲邊方要區。漢人留鎮者多。城市皆華風。而山居夷性各異。領州一。縣三。

黃平州。無所領。湄潭。餘慶。甕安。

鎮寧州。古荒服地。元始置鎮寧州。明因之。地險扼。漢夷雜居。風俗各異。婚姻論牛。領長官司二。

康佐。十二營。

威清道領安撫司一州三。

凱里安撫司。古蠻夷地。唐始置蘭州。元改永寧路。明以其地當滇黔要衝。置守禦所。嘉靖中。改安撫司。地險要。俗勁悍。不務耕桑。專以貨易。無所領。

普安州禹貢梁州界。天文井鬼分野。古夜郎地。秦屬黔中。漢屬牂牁。蜀漢置興古郡。唐改西平。尋改盤州。元置普安路。明改爲州。其地界雲貴川廣之交。要衝之地。民頗繁華。夷獨巧佞喜佛。

永寧州。元始置。明因之。山川險峻。林箐幽僻。夷五種。習尚各異。大約男女自婚。佩刀弩。喜射獵。領

募役。頂營二長官司。

安順州。古羅甸。普里部。元置習安州。屬雲南。明改安順州。其地襟帶三川。衝要劇地。漢人直而尚義。夷人鄙陋頗馴。領

寧谷。西堡二長官司。

直隸布政都二司衛十四。其地多夷種。風土不一。山險人悍。徒跣者多。貧瘠鄙陋。惟威清知文字。習禮教。餘多相類。

威清。平壩。安莊。普安。普定。安南。六衛統於威清道。新添。龍里。二軍民指揮衛統於新鎮道。都勻。畢節。

清平。烏撒。興隆。赤水。六衛統於都清道。

邊關。

史官論曰。邊關之至於明季。蓋名存而實亡矣。烽火相望。未嘗不聯絡數千里。所在據形勝。築濬餉。餽芻秣器具之費無寧歲。閭左耗竭。而一旦有警。則左右莫枝梧。蹂躪內地。墮名城。子女玉帛。飈然而走荒遐。

而太祖太宗迅掃三犁之烈蕩然。實錄淪澌。鼎圖搖撼。以至於亡。勝衰之勢。豈不以邊哉。當明初。獮薙開拓。遠逐龍荒。遂設遼東大同延綏寧夏甘肅六邊。各屯重兵鎮之。維時大寧擁峙於山後。東勝雄建於河北。河套未入於火籬。全遼未歸於戰勝。金甌無缺。窳帳遠居。猗歟盛矣。其後大寧徙而薊州危。三韓沒而山海震。東勝失而山西薄。河套棄而固原迫。四鎮始皆稱邊。然始則東起遼左。西抵河西。雉堞巍城。聲援相接。譬如率然也。夫昔之六而守日陞。後之九而守日瑕。蓋以險在我。則窺伺者舞門庭之外。險與共。則狎侮者軒堂奧之中。易曰。王公設險。乃舉創造全盛之地。敵蹤棄之無怪色。曾疆場綺分之謂何。衡其輕重。則薊州宜大獨重於諸邊。環拱陵寢。夾輔京師。肩臂肘腋。於人之身。抑重矣。夫自古建都。必據形勢。太宗定鼎幽燕。居外馭內。南面以臨海宇。獨近在邊郵。則守禦爲艱。然而大寧之內。徒三衛之外。向獨石之孤懸。豐勝之淪沒。撫今追昔。寧無歎慨。而況於數千里巖疆。一旦波沈陸海。則明季邊臣之偷玩。有不忍言者。而跡其始境。寧不罪有所歸哉。今紀其盛時。以見方域之勝。而開平與和哈密東勝諸地。陷棄已久。茲不入譜云。

薊鎮

薊京師左輔也。本古會州地。明初設北平行都司。與營諸屯衛。封建寧藩。與遼東宣府聯絡爲外邊。已而大將軍達經略自古北至山海。增關隘爲內邊。永樂中。移大寧都司於保定。散置營州等衛於順天之境。以其地處兀良哈。分建朵顏泰寧福餘三衛。通貢互市。倚爲藩籬。自是紅螺白雲之北棄矣。故遼東宣府

之聲援阻絕不通。自後部落日蕃，往往爲入犯嚮道。嘉靖中，深入畿南，薄京城，而薊遼設憲臣，宿重兵，以爲重鎮，不止松林百萬，邈隔山河，且使京畿肩臂爲牧馬場矣。設關三路，十二口，一百一十三營，四十三堡，六十一城，十有一寨，七十二。

山海關 居庸關 馬水關 路十二 曰曹家 牆子 古北 石門 太平 喜峯 松棚 馬蘭
山海 石塘 燕河 建昌

遼東

遼東設都指揮使司。禹貢冀青之域，天文箕尾分野，舜分冀東北爲幽州，廣寧以西是也。分青東北爲營州，廣寧以東是也。戰國屬燕，秦分遼東西二郡，漢改襄平遼陽，武帝拓朝鮮地，割遼東置樂浪玄菟真蕃臨屯四郡，東郵古三韓地，曰馬韓，曰辰韓，曰弁辰韓。後漢始拓屬中國，漢末爲公孫度所據，魏置襄平州，晉末爲慕容廆所據，隋爲高句驪所據，唐置蓋遼二州，後入契丹，阿保機修遼東城居之，曰東平郡，尋陞爲南京，改東京，元爲東京路，明爲府州縣，尋置定遼都衛，又改遼東都指揮使司，革所屬惠耀懿三州及鶴海析木諸縣置衛，永樂中置安樂自在二州，其地平衍膏腴，負山面海，東北一都會也，人多異好，士習詩書，性善騎射，務農好巫，領州二，衛二十五。

自在州 安樂州 定遼中 海州 益州 復州 金州 廣寧 義州 廣寧後 廣寧中屯

寧遠 廣寧左屯 廣寧右屯 廣寧前屯 瀋陽中 鐵嶺 三萬 遼海 定遼左 定遼右

定遼前。定遼後。東寧。開原。廣寧後屯。錦州。

宣府鎮

宣鎮。古代郡。秦漢皆上谷地。明初卽元上都。設開平衛守之。置驛東接大寧。西接獨石。太宗四出塞。皆自開平興和出。已乃棄大寧與敵。而興和亦廢。開平孤立難守。宣德中。遂徙衛獨石。蹙國三百餘里。正統獨石八城殘破。而宣府遂爲極邊重鎮矣。其山川糾紛。地險而狹。鎮分五路。

鎮城

領堡一。

西路。領萬全衛。萬全左衛。懷安城。堡九。南路。領順聖西城。順聖東城。蔚州城。

廣昌城。堡四。北路。領獨石城。龍門所城。長安嶺城。堡十五。中路。領龍門城。堡十。

東路。領永寧城。懷來城。保安城。保安舊城。柳溝城。岔道城。堡十二。

大同鎮

大同。原古戎夷地。夏商屬冀州。周隸并州。或爲代。或爲趙。漢置雲中郡。西起了角。東止陽和。邊長六百四十餘里。東北與諸和連袂。西接套夷。在九邊中稱絕塞焉。明於諸邊率建墩列戍。獨於大同設爲大邊二邊。聯絡不已。蓋有深意焉。歲久傾圮。乃棄而不守。雲中重險盡失。而跳梁莫禦。遂歲見蹂踏。君子有遺憾焉。雖常苦衝而未嘗有異圖也。及姦民邱富輩教以攻城之術。於是雲中四境邊堡蕭然。無復有存焉者。極而至於石州之禍。亦可醜也。大邊之外。卽爲豐州。地多沃衍。爲駐牧巢穴。而驅掠之民。亡命之徒。日走集焉。終明之世。虎噬狼吞。日驚烽燧。兼之鎮兵象養日久。驕悍不馴。兩逐王居。交相詬噪。甚者交通無忌。

禦暴而反暴焉。夫狂瀾既潰，障蔽爲艱，積習相循，轉移無法，而國以淪亡，則大同之終不靖也。古魏尙李廣之功，稱千古矣。領衛八所，七堡五百八十三。

天城衛 大同左衛 大同右衛 大同中衛 大同前衛 大同後衛 威遠衛 平虜衛

山西鎮

山西鎮，卽太原省會，而北接宣大，蓋重門待暴之意。昔趙以李牧守雁門，兼有句注之地，至武靈王破東林樓煩，築長城以限匈奴，此地雖腹而實邊矣。明以山右爲肘腋，故建屏太原，立三關以障之。正統以後，圍人不戒，邊釁滋張，北虜據東勝而三關困，西虜據河套而偏老危，澤潞太原汾代相繼犯，而全省騷動。山西雖腹裏而不止邊，且爲衝邊矣。除郡縣列於山西省，所領關三城五堡二十四。

雁門關 寧武關 偏頭關 廣武城 北樓城 寧化城 老營城 河曲營城

真保諸關隘

舊以紫荆倒馬居庸爲內三關，後以居庸屬薊鎮，而真保一帶，則自爲鎮，駐真定，設憲臣，宿重兵其間，西出井陘，則固關其外，土馬不能成列，卽韓信拔幟立幟處，迤而北則龍泉，折而東則倒馬紫荆，遂界桑乾，實爲內鎮，其外則宣大，宣大有警，則真保戒嚴，况關皆平原曠衍，無高山大川爲之限隔，是一要邊也。以四關計之。

紫荆關 領口七十有六，外一層城，口五十有二。倒馬關 領口一百七十有七。龍泉關 領

口五十有一。固關領口九。

榆林鎮

榆林舊治綏德。後棄魚河幾三百里。成化中徙鎮榆林堡。築邊城。自黃甫川西抵定邊。亘千二百餘里。橫截套口。內復塹山堙谷。是曰夾道。形勝之地也。寇自是不渡河。得安耕牧。益以樵採園獵之利。稱雄鎮焉。久之寇入套爲巢穴。成化弘治正德屢有披套之議而不果。鎮城四望白草黃沙。孤懸於外地。無穀產。商無通貨。一切芻糗仰給腹裏。弘治正德中布政文貴侍郎馮清改本色爲折色。重以災蠲民逋。動計百萬。以故鎮用大窘。倪岳許論嘗欲逆舟河渭。轉漕於斯。亦佳。議惜不行。其地險阻。將士懷忠。長法死無怨言。勇敢有氣節。蓋將數也。分路三。

東路領堡九。中路領堡十。西路領堡十有四。

寧夏鎮

寧夏古朔方地也。漢屬北郡。漢唐置靈武郡。靈州故城在賀蘭山。明終棄之。其地賀蘭環其西北。黃河繞其東南。後魏薄骨津開河渠灌田。大獲其利。至今賴之。領衛五所。四營。四堡。十有八。

寧夏。寧夏中。寧夏後。左屯。右屯。中屯。前衛。平虜所。靈州所。興武所。韋州所。

清水營。小鹽營。玉泉營。廣武營。花馬池城隸。

固原鎮

固原本戎羌地。秦闢爲隴西郡。明建臨鞏二府。置衛所十二以司防禦。而州縣則專綏民社。其建自寧夏中衛而西而北折而南。宛轉二千六百餘里。蓋分陝之適中。控制之上游也。然黃河積石環於後。岷冢嘉陵距於前。控番在岷。而有洮陽疊川之隔。禦虜在原。而有金城烏蘭之壯。偉哉山河之固。金城之國也。爲三秦門戶。惟是抱罕西河之險。以及陰平武都之壤。連帶蜀漢。環拱諸羌。而冉驪白馬。禍唐宋之吐蕃不達。又不特祇有虜患已也。領衛五所三。

靖虜衛領堡四口百二十。蘭州衛領堡口三十。河州衛領關二十有四。所一堡三站七屯十。洮州衛領關五寨二堡二十有四。岷州衛領所三寨七十堡八屯八十二。西固守禦所領城寨一十七。階州所領堡十有三。文縣守禦所領寨堡十。

甘肅鎮

甘肅以甘州肅州而名。故漢金城武威張掖酒泉四郡。西控西域。南隔戎羌。北蔽邊塞。蓋西郵孤懸絕塞也。明初設哈密以爲捍衛。卽漢武斷匈奴右臂之意。自土魯番屢肆劫奪。陝巴失守。其部落皆散置關外。而甘肅之藩籬旣頽。迄無寧歲。其地接祁連。跨燕支。連亘縣遠。古匈奴失此地。嘗歌曰。亡我祁連。使我六畜不蕃。亡我燕支。使我婦女無姿。蓋卽此也。領關一衛八所三。

嘉峪關 甘州衛所一 肅州衛所一 涼州衛所一 鎮番衛堡二 岷衛所一 莊浪衛 永昌衛堡五 西寧衛所一

古浪守禦所 高臺守禦所 鎮夷守禦所

明書卷四十四

志三

麻法志一

史官論曰。攷前代史書之言麻者。十有二家。獨司馬遷沈約宋濂有專書。推步精確。而班固范曄魏收唐太宗魏徵則兼言律。大率窮極理數而非其法。至劉義叟之新唐書。脫脫之宋史。則列之天文志。而歐陽修五代史僅及五星。遼史第紀閏考。夫亦各就所見而言之耳。蓋治麻之事。昧者若瞽。明者若寄。麻初有六家。黃帝顓頊夏商周魯秦用顓頊。漢因之。或曰用殷。故通鑑編年數日兩存之。自武帝更造太初。迄東漢凡四改。自魏至隋凡十三改。唐初至周末凡十六改。宋前後凡十八改。金熙宗至元末凡三改。率皆行之不久而差。差則改。然天運本不能齊。幾微渺末。積而必差。而欲一定之法齊之。則必不能。雖其勢乎不知。測驗既真。則於過不及之際。聊一伸縮。卽得而合焉。必欲矯逞聰明。作爲創獲。鮮不貽譏來禛哉。

明興。太祖首嚴欽若麻象之典。吳元年。開括蒼劉基名。聘至都爲太史令。冬。基率其屬高翼等上戊申大統麻。洪武元年。改太史院爲司天監。尋以司天非欽崇天道之意。更曰欽天立官屬。詳職官志。乃召集故元太史院使張佑等。及回回司天監里的兒阿都刺等十四人。明年。又召鄭阿里等十一人至京師。議麻。

法占天象。三年著令。凡元象圖書。非其職者不得習。習者罪。乃分欽天監官。生人爲四科。曰天文。曰漏刻。曰大統麻。曰回回麻。各專科肄焉。乃築欽天監觀星臺於鷄鳴山。回回欽天監於雨花臺。凡歲麻成。先期於十月一日上之。曰大統麻。中有御覽。月令麻。躔度麻。王麻。復有壬遁麻。壬遁麻則御覽其事六十七。曰祭祀祈福。解除冠帶。宴會招賢。選將訓兵。安撫邊境。結婚姻。進人口。求醫療病。入學。興造動土。豎柱上梁。補垣繕城郭。安碓磴。開市立券。交易沐浴。安牀。整手足甲。緩刑獄。施恩惠。恤獨悖。布政事。捕捉施恩。封拜。覃恩。肆赦。頒詔。雪冤枉。賞賀。遣使裁製。上官赴任。搬移。開渠穿井。修置產室。納畜牧養。取魚慶賜。行幸掃舍。宇整容剔頭。納采問名。行惠慶舉。正直出軍征伐。經絡求嗣。上册進表章。修飾垣牆。納財栽種。臨政親民。平治道塗。出師詔命公卿。築隄防。宣政事。營建宮室。命將出師。嫁娶畋獵。王麻三十事。中宮東宮親王同。大約皆壬遁中事。民麻三十二事。而節氣躔次時刻種種務精確。若回回麻。起於西域。以今考之。其原實起於隋開皇十九年己未之歲。其法則以二百五十日爲一歲。歲有十二宮。宮有閏日。凡百二十有八年。閏三十有一日。又以三百五十四日爲一周。周有十二月。月有閏日。凡三十年閏十有一日。歷千九百四十一年。而宮月甲子再會。其白羊宮第一日。日月五星之行。與中國春正定氣日之宿直同。太祖取與中國麻相參推步。尋以與大統相左。革之。其人令習大統法。七年七月製觀星盤。是年博士元統上言。臣聞一代之興。必有一代之麻。隨時修改。以合天道。今麻雖以大統爲名。而積分猶授時麻數。况授時麻法。以至元辛巳爲麻元。至洪武甲子。積一百四年。以麻法推之。得三億七千六百一十九萬九千七百七十。

五分。經云。大約七十年而差一度。每歲差一分五十秒。辛巳至今年。遠數盈漸。差天度。擬合修改。請以洪武甲子歲冬至爲厯元。而七政則有遲疾順逆伏見之不同。實難推演。聞磨勘司令王道亨郭伯玉精九數之學。願徵令推算。以昭一代之典。上是其言。尋擢爲監正。乃以甲子爲厯元。已監副李德芳上言。故元至正辛巳爲厯元。上推往古。每百年消一日。每百年消一日。永久不可易也。今監正元統改作洪武甲子。厯元不用消長之法。考得春秋晉獻公十五年戊寅歲。距至元辛巳二千一百六十三年。以辛巳爲厯元。推得天正冬至在甲寅日夜子初三刻。與當時實測數相合。洪武甲子元正。上距獻公戊寅歲二千二百六十一年。推得天正冬至在己未日午正三刻。比辛巳爲元。差六日四時五刻。當用辛巳元及消長之法。方合天道。疏奏。元統復言。臣所推甲子厯元。實與舊法相合。毫無差謬。上曰。二統皆難憑。只驗七政交會行度無差者爲是。後第以甲子爲厯元。正統四年。造渾天璿璣玉衡簡儀。十一年。令簡儀九道圭表壺漏。並准南京。作晷影堂。以便窺測調品。景泰中。造簡儀銅壺。至嘉靖三年。光祿少卿管欽天監事華湘上言。天子奉順陰陽。治厯明時。時以作事。事以厚生。而世從治也。時苟不明。將弦望晦朔失其節。分至起閉乖其期。無以該治生靈而世亂矣。夫厯數之行。代有作者。曷嘗不廣集衆思。人無遺策。法無遺巧。期於永久不變也哉。然不數歲而輒差。厯所以差。由天周有餘而日周不足也。日之差則驗於中星。堯冬至昏昴中。而日在虛七度。躔元枵之子。今冬至昏室中。而日在箕三度。躔析木之寅。計去堯三千餘年而差五十度矣。再以赤道攷之。勝國至元辛巳改厯。天正冬至。赤道歲差一度五十秒。今退天三度五十二分五十秒。

矣。黃道歲差九十二分九十八秒。今退天三度二十五分七十四秒矣。故洪武中元統言麻。雖以大統爲名。而積分猶授時之數。年遠漸差。今距元辛巳及元統上言時。歲在洪武甲子。僅一百四十年。迄今則二百四十二年。授時麻法。每歲差一分五十秒。約七十年差一度。今合差三度餘矣。是以正德戊寅日食。庚辰月食。時刻分秒。起復方位。多與監官推算不合。恭惟皇上入繼大統之年。適與元革命改憲之年合。則調元正麻。固有待於今日也。臣伏窺古今善治麻者三家。漢太初以鍾律。唐大衍以蓍策。元授時以晷影。而晷影爲近。其所因者本也。欲正麻而不登臺測景。竊以爲空言臆見耳。伏望許臣暫住朝參。督同臣監官及掄選疇人子弟諳曉本業者。及冬至前。詣觀象臺晝夜推測。日記月書。至來年冬至。以驗二十四氣分至。合朔。日躔。月離。黃赤二道。昏旦中星。七政四餘之度。視元辛巳所測差次。錄聞詳定歲差。以成一代之制。其論歲差法。有曰堯時冬至虛一度。夏至柳十四度。春分胃十二度。秋分氐十度。唐開元大衍麻。冬至斗十度。夏至井十度。春分奎七度。秋分軫十四度。宋麻元麻冬至斗二度。夏至井十六度。春分奎初度。秋分軫七度。此歷代之麻。可驗者如此。然雖有進退。其度不出次舍前後。蓋天運星行動體也。未免前卻不齊。麻家步算。乃死法耳。安得與天相符。故曰歲差。後世修改。求合夫天。不得不然。漢自鄧平改麻。後洛下閔八百年。當差一度。當時史官攷諸上古中星。已差五度。而閔未究。蓋古爲麻者。未有歲差之法。其論冬至躔宿。一定不移。不知天日會餘分。積久必爽。今歲冬至日躔。視去歲恆不齊。至晉虞喜始覺其差。乃以天爲天。歲爲歲。立差法以追其變而算之。約以五十年而退一度。然失之太過。宋何承天倍增其數。約

以百年退一度而又不及。至隋劉焯取二家中數。以七十五年爲近之。然未甚密。至唐僧一行乃以大衍麻推之。得八十三年而差一度。自唐以來。皆宗其法。至元郭守敬算之。約六十六年而差一度。算已往減一算。算將來加一算。而歲差始爲精密。至今二百餘年。每有不合。嗟乎。天動物也。進退盈縮。未免不齊。一定之法。顧可拘執哉。况法自有權宜者。如定歲之法。四期餘一日之數。分於四期。則二至之定。每疑於絲忽之間。須酌量以定。無常準。定日之法。一日變爲九百四十晝。以氣朔有不盡之數。難分也。每月三十日。而二氣盈四百一十一晝。二十五秒。一朔虛四百四十一晝。積盈虛之數。以成閏。故定朔必視四百四十一晝之前後。以爲朧朧。故定朔每疑於一晝之間。亦須酌量以定。無常準。如日月交食之法。時刻分秒。最爲精微。其至半秒難分之處。亦須酌量以定。無常準。故至之絲忽。朔之一晝。食之半秒。積之歲久。則皆差失。不合原算矣。而日官周濂。請驗交食。以更厯元。後禮部員外郎鄭繼之。嘗以月食分秒不協。亦上言請改厯元。則其疏全以華湘歲差之議入告。而支大綸則議以爲按授時厯法。雖起於至元辛巳。而不以辛巳爲厯元。其法以七千二百五十七萬六千爲一元之中。平分天地人三元。每元計二千四百二十九萬二千。自太乙甲子。自嘉靖四十三年甲子。已五千二百九十五萬八百四十矣。是天地二元也。今當一千九百六十一萬七千六百已在人。乃後推將來。每年增一。前考已往。每歲減一。是以太乙甲子爲厯元。而不從辛巳起也。今以辛巳爲厯元者。厯家以世遠數分而難於竟功。故截去始元。而以辛巳耳。歲差之法。起於子半虛六度。約下十六年而退一度。自堯至洪武甲子。退四十九度五十七分。故冬至日躔箕七度。

七十七分。正統甲子退五十度四十一分。故冬至日躔箕六度九十六分。弘治甲子退五十一度二十四分。故冬至日躔箕六度十三分。嘉靖甲子退五十二度七分。故冬至日躔箕五度三十分。以後每度約退一分三十八秒四十九微。自嘉靖至萬曆六十一年。又退九十三分。非復元之舊矣。至懷宗中以日食分刻。西儒與欽天監所算不同。監正戈近亨反復辯論。而西儒頗合。上是其議。遂於東長安街開麻局。建觀星臺。以內閣大學士徐光啓領其事。選疇人子弟受西儒法成書。賜名崇禎麻書。圖象工巧。推算精密。會喪亂不果行。今惟以大統麻法著於是篇。其同於元史授時者不載。卽有同處。亦必用之法。不得不錄。而元史有其法無其數者。增列之七政麻。茲詳日月定度外五星。雖見之五代史。而有其數無其法。元史具兩法而無成局。至四餘則諸史所不載。故特增之。以存明麻法之梗概云。

明書卷四十五

志三

厯法志二

大統厯推算成法。

求中積分。

置歲實以所距積年爲法乘之。

歲實三百六十五萬二千四百二十五分。

求通積分。

置中積加氣應爲通積。△氣應五十五萬△六百分。

求天正冬至。

置通積滿紀法去之。餘得冬至日及分秒。

若求次年冬至加通餘滿紀法去之。

紀法六十萬。

通餘五萬二千四百二十五分。

求次氣。

置冬至日及分秒以氣策之累加之。

氣策一十五萬二千一百八十四分三十七秒五十微。

求閏餘。

凡閏餘一十八萬六千五百五十二分△九秒已上其年有閏。

置中積加閏應滿朔實去之餘爲閏餘。

若求次年閏餘以通閏累加之滿朔實去之。

閏應二十△萬二千△五十分。

朔實二十九萬五千三百△五分九十三秒。

通閏一十一△萬八千七百五十三分八十四秒。

求天正經朔。

置通積減閏餘滿紀法去之餘爲天正經朔日及分秒。

又法置冬至全分減閏餘即得不及減者加六十萬減之。

求弦望及次朔。

置天正經朔日及分秒以弦策累加之。

徑求望用望策求次朔用朔策。

弦策七萬三千八百二十六分四十八秒二十五微。

望策一十四萬七千六百五十二分九十六秒五十微。

求盈縮麻。

置半歲周減閏餘。

冬至後為盈。夏至後為縮。

半歲周一百八十二萬六千二百一十二分五十秒。

求弦望及次朔盈縮麻。

置所得盈縮麻日及分秒。以弦策累加之。滿半歲周去之。

元是縮麻。交入盈麻。元是盈麻。交入縮麻。凡遇半歲周。則盈縮交換一次。若竟求次月。以朔策累加之。滿半歲周去之。

求盈縮麻初末限。

視所得盈縮麻日及分秒。盈者在盈初縮末限。已下為初限。已上者反減半歲周。餘為末限。縮者在縮

初盈末限。已下為初限。已上者反減半歲周。餘為末限。

盈初縮末限。八十八日九千九百九十二分二十五秒。

縮初盈末限。九十三日七千一百二十二分二十五秒。

求盈縮差。

置盈縮末日分秒。如無末。以初分秒。以立成各日下盈縮加分乘之。得數定位。加其下盈縮積度。即得。

以萬

爲度不滿 盈初縮末冬至前後取 縮初盈末夏至前後取 盈初在冬至縮初在夏至
爲分秒

求遲疾麻

置中積加轉應減閏餘滿轉終分去之餘在小轉中已下者爲疾麻已上者減小轉中餘爲遲麻

轉應一十三萬△二百△五分

轉終二十七萬五千五百四十六分

小轉中一十三萬七千七百七十三分

求弦望次朔遲疾麻

置所得遲疾麻日及分秒以弦策累加之滿小轉中去之元是疾麻交入遲麻元是遲麻交入疾麻

凡遇小轉

中遲疾交換一次若竟求次月以

朔轉差累加之滿小轉中去之

朔轉差一萬九千七百五十七分九十三秒

求遲疾麻限數

置所得遲疾麻日及分秒以十二限二十分乘之得數定位滿萬爲一限若求次限於所推限數全分以限策累加之滿限總去之

限策九十三萬△六百八十三分△八秒六十五微以十二限二十分乘弦策

限總一百六十八萬△八百三十分△六十秒。以十二限二十分乘小轉中。

求遲疾差。

置各遲疾麻日及分秒。以立成各限下日率減之。餘爲實。以其下損益分乘之。得數定位。以八百二十除之。得數定位。益加損。益其下。遲疾積度卽得。如遇遲疾麻日及分秒數少不及減遲疾日率分者。退前一限減之。

又法。置遲疾麻及分秒。減立成各限下日率分。餘爲實。以其下損益新法乘之。得數定位。益加損。減其下。遲疾積度卽得。

求加減差。

置盈縮差與遲疾差。同名相併。異名相消。盈遲縮疾爲同名。盈疾縮遲爲異名。

以八百二十乘之。以立成遲疾限下日率除之。得加減差。

盈遲爲加差。

縮遲爲減差。

盈疾者盈多爲加。疾多爲減。縮遲者縮多爲減。遲多爲加。

又法。置盈縮遲疾二差。同名相併。異名相消。以各限下遲疾麻捷法乘之。卽得。

求定朔及弦望日分秒。

置經朔弦望日及分秒以加減差加減之即得。如干在日出分以下退一日命甲子。

求定朔弦望日辰。求節氣日辰同。

置各定朔弦望日及分秒命甲子算外一辰即是。若定弦望日辰必視盈縮歷日與冬至夏至日出分立成內相同積日下日出分如在定弦望小餘分已下者其日命甲子算外一辰如在已

上者當退一日而命

甲子定日。

甲子[△]乙丑^一丙寅^二丁卯^三如此遞加至癸亥^{五十}九日。

求合朔時刻。與節氣時刻同。

置定朔小餘分秒加二。即十二時乘。得數滿萬為一時起子時正算若時下小餘滿五千分。半辰法。者起於前位通

作一辰起子時初算外即得時○求刻以時下小餘減一。即十二時除。得數滿百為刻一為一刻二為二刻。

三為三刻四為四刻空百即為初刻。又云如定期小餘無千百止有十零數者即命子時其刻數如下位列數前進一位用二除之或不進數或不及減者皆為正初。

求月大小

視定朔天干與次朔天干同者爲大月。不同者爲小月。無中氣爲閏月。

求閏月。

視天正閏餘在閏限以上者爲有閏。即以朔實減去閏餘。以月閏除之。即得。

閏限一十八萬六千五百五十二分△九秒。朔實內減通閏。

月閏九千△百六十二分八十二秒。以十二除通閏。

求交泛。

置中積加交應減閏餘滿交終分去之。即得。

交應二十六萬△三百八十八分。

交終分二十七萬二千一百二十二分二十四秒。

求次朔望交汎。

置所得交汎日及分秒。以交望累加之。滿交終分去之。即得。若徑求次月。以交朔差累加之。

交望一十四日七千六百五十二分九十六秒五十微。

交朔差二日三千一百八十三分六十九秒。

求虛法。即減之。

視經朔小餘分秒。如在朔虛四千六百九十四分△七秒已下者。為有虛。已上無虛。置有虛經朔小餘分秒。以朔虛除三

十日六十三分九十一秒乘之得數。復加經朔大餘日。滿紀法去之。命甲子算外一辰。即朔虛日。若求次虛日者。

以所得朔虛日及分秒累加虛策。即得。

虛策二日九千一百△四分二十三秒。

古法置有虛經朔小餘分秒。以三十日乘之。又以朔虛除之得數。加經朔大餘日。即得。

朔虛四千六百九十四分△七秒。

求盈法。即沒日。

視各恆氣小餘分秒。如在盈限七千八百一十五分六十二秒半已上者。為有盈。已下無盈。置策餘十五除氣策。一萬△

一百四十五分六十二秒半。減有盈氣小餘分秒。餘為實。以六十八分六十六秒乘之得數。加恆氣大

餘日滿紀法去之。命甲子算外一辰。即氣盈日。若求次盈日者。以所得氣盈日及分秒累加盈策。即得。

盈策九萬六千六百九十五分二十八秒

古法置有盈恆氣小餘分秒以一十五日乘之減氣策一十五萬二千一百八十四分三十七秒半餘爲

實以氣盈除之得數加其恆氣大餘日即得

氣盈二千一百八十四分三十七秒五十微

求土旺

置四季中氣日及分秒減土旺策各得其季土始用事日土旺策三萬△四百三十六分八十七秒半

又法置四季節氣大小餘分加土旺差一十二日一千七百分滿紀法去之

求直宿分

置通積減閏餘滿宿實累去之餘爲直宿分

宿實二十八萬

求各分直宿分

置所得直宿分以宿策累加之滿宿實去之

宿策一萬五千三百△五分九十三秒

求各月定直宿次

置所得各種宿分以其朔下加減差加減之皆命虛宿算外即得

起二十八宿歌。

一八十五念二九。每月常將艮爲首。除了坎宮一字。八卦便向循還走。大月雙加小月單。

二十八宿順鋪難。失了源頭無處尋。記取正月一日間。

寅午戌星心室參角牛胃。亥卯未昂張尾壁井亢女。己酉丑房危觜軫斗婁柳。申子辰虛畢翼箕

奎鬼氏。

赤道宿度。

三百六十五度二十五分七十五秒。

角十二。一。九。九。二。氏十六。三。房五。六。心六。五。尾十九。一。箕十。四。

東方七宿共七十九度二十分。

斗二十五。二。牛七。二。女十一。三。十。虛八。九。十。危十五。四。室十七。一。壁八。六。

北方七宿共九十三度八十三分太。

奎十六。六。婁十一。八。胃十五。六。昂十一。三。畢十七。四。觜初。△。參十一。一。

西方七宿共八十三度八十五分。

井三十三。三。鬼二。二。柳十三。三。星六。三。張十七。五。翼十八。七。軫十七。三。

南方七宿共一百八度四十分。

求冬至日躔赤道宿度。

置中積加周應爲通積。滿周天分去之不盡。命起子中虛宿。六度外依各宿度去之。卽不滿宿。卽所求冬

至加時日躔赤道宿度及分秒。

又滿尾宿總度去之卽是。

周應三百一十五度一十一分七十五秒。

尾宿總度三百△度一十一分七十五秒。

此虛九起至尾十九度一十分總數。

一法置歲差一分五十秒。以積年乘之得數。用減周應。餘減去尾宿總度。卽得。

求四正赤道日度。

置天正冬至加時赤道日度。累加象限。滿赤道宿次去之。各得春夏秋正所在宿度及分秒。

黃道宿度。

三百六十五度二十五分七十五秒。

角十二。八十七 九九。五十六 氏十六。四十八 房五。四十七 心六。二十七 尾十七。九十五 箕九。五十九

東方七宿共七十八度十二分。

斗二十三。四十七 牛六。九十一 女十一。十 虛九。△△ 危十五。九十 室十八。三十 壁九。三十

北方七宿共九十四度一十分太。

奎十七。^{八十} 婁十二。^{三十} 胃十五。^{八十} 昂十一。[△] 畢十六。^五 觜初。[△] 參十。^{二十} 八。

西方七宿共八十三度九十五分。

井三十一。[△] 鬼二。^十 柳十三。^{星六} 一。^{三十} 張十七。^{七十} 翼二十。[△] 軫十八。^{七十} 五。

南方七宿共一百△九度△八分。

求冬至日躔黃道宿度分秒。

置天正冬至加時赤道日度以立成內赤道度減之。不及減者退一度減之。餘以黃道率乘之。如赤道率而一所得定

位以加其下黃道積度即得。

求四正黃道積度。麻家第 三格。

置天正冬至黃道宿度為冬至黃道積度以冬至黃赤道差。乃赤道與黃道相減餘數。與次年冬至黃赤道差相減餘四

而一所得加八歲周象限為定象度累加冬至赤道積滿周天分去之各得所求。

求四正黃道日度分秒。

以所得四正黃道積度滿黃道宿次去之至不滿宿即得。

求四正定氣日一格

置四正恆氣日及分秒冬夏以恆爲定春分減盈縮差秋分加盈縮差各得所求。

盈縮差二日四千△一十四。

一法以冬至加盈初縮末限爲春正又加縮初盈末限爲夏正又加縮初盈末爲秋正。

求四正相距日麻家第
二格

以四正定氣日用減後正定氣日不及減者加
旬周減之餘加一旬周即得。

求四正黃道積度。

置四正定氣日小餘以其日行度乘如日用萬而一所得爲減分第四
格以減四正黃道積度即得四正晨

前後半黃道積度第五
格日行度。

冬至用盈初縮末初日下一度△五一△八五。

夏至用縮初盈末初日下△度九五一一六一。

春正視相距日如九十三日用縮初盈末九十三日下初度九九九七△三如九十四日用縮初盈末

九十四日下一度△△△△△。

秋正視相距日。如八十八日。用盈初縮末八十八日下一度△△△△五△五九。如八十九日。用盈初縮

末八十九日下一度△△△△△。

求四正晨前夜半黃道日度。第六格。

置四正晨前夜半黃道積度。滿黃道宿度去之。至不滿宿。即得。

求四正夜半黃道相距度。

置推得四正夜半黃道積度。用減後正夜半黃道積度。不及減者。加周天分減之。餘即前後正定氣日所求者。

求四正黃道日差法。

累相距之日行定度。與相距度相減。餘為實。如相距日而一。則是相距度。多為加。少為減。

秋分距冬至行定度。八十八日。行定九十△度四十分△九秒。三五六八。

八十九日。行定九十一度四十分一十四秒。六一。

春分距夏至行定度。九十三日。行定九十△度五十九分九十一△秒。五九八九。四七三九。

九十四日行定九十一度五十九分八十七秒。五九八六四六八
△度九五一一五六

求四正後每日晨前夜半黃道日度及分秒。

置四正後每日行度。以日差加減。爲每日行定度。累加四正晨前度半黃道日度。滿宿次去之。卽得。

求每日午中黃道日度。

置其日行定度半之。以加其夜半黃道日度。卽得。

黃道十二次宿度定局。

危十二度六十四分九十一秒。

入姬營之次。辰在亥。

奎一度七十三分六十三秒。

入降婁之次。辰在戌。

胃三度七十四分五十六秒。

入大梁之次。辰在酉。

畢六度八十八分△五秒。

入實沈之次。辰在申。

井八度三十四分九十四秒。

入鶉首之次。辰在未。

柳三度八十六分八十八秒。

入鶉火之次。辰在午。

張十五度二十五分△六秒。

入鶉尾之次。辰在巳。

軫十△度△七分九十七秒。

入壽星之次。辰在辰。

氏一度一十四分五十二秒。

入大火之次。辰在卯。

尾三度△一分一十五秒。

入析木之次。辰在寅。

斗三度七十六分八十五秒。

入星紀之次。辰在丑。

女二度△六分三十八秒。

入玄枵之次。辰在子。

求八十二次時刻。

各置八次宿度及分秒。以其日晨前夜半日度減之。餘以日周乘之爲實。以其日行定度爲法。實如法而一所得。依發斂加時求之。卽得。

明書卷四十六

志二

麻法志三

大統麻推日月交食成法。

驗日月食限。

萬爲日千爲十
刻百爲一刻。

陽食入交定局。

視定朔
下交汛。

在△△日五十刻已下不食。

在二十六日△△二刻已上日月皆食。

在十三日△△刻已上日月皆食。

在十四日七十五刻已下日月皆食。

在△△日五千四百五十五分已下日月皆食。

在二十五日六一五一分已上日月不食。

在十二日△△八九已上日月不食。

在十四日一五一六已下。日月皆食。

陰食入交定局。

視定望
下交汛。

在△一日二十五刻已下。日月不食。

在二十六日△二刻已上。日月皆食。

在十二日四十二刻已上。月食。

在十四日七十五刻已下。日月皆食。

在△一日一八七二已下。食以上不食。

在二十六日△二四九已上。日月皆食。

在十二日四一八九以上。食以下不食。

在十四日七九三三以上。食以下不食。

又在交望一十四日七六五二九六五已下。食已上不食。

又在交終二十七萬二一二二四已下。食已上不食。

又在交中一十三萬六△六六一二已下。食已上不食。

右日月食限。如日食定朔小餘分在夜刻。月食定望小餘分在晝刻。卽同不食。又與各交汛大餘數

同者食。不同者不食。

凡已上已下指小餘而言。萬已上爲大餘。千已下爲小餘。

驗日食在夜。月食在晝。

凡日食定朔小餘在一千二四九已下。八千八四九已上。爲食在夜刻。

起亥初初刻。止丑正四刻。凡

月食定望小餘在三千△一六已上。七千△八千已下。爲食在晝刻。

起辰初初刻。止申正四刻。

推日食成法。

推日食合用數。

經朔全分。盈縮麻全分。盈縮差全分。

遲疾麻全分。限數。

遲疾差全分。

加減差全分。

定期

全分。交泛全分。定入遲疾麻全分。

定限。定限行度。日出分。

半晝分。

日入分。

歲前冬

至加時。黃道宿次度分。

右凡推日食。俱要逐一先錄出。以備取算。元是盈麻書盈。元是縮麻書縮。小餘皆止乎微。惟交常度當

全錄。

求交常度。

置有食之朔下。交泛全分。以月平行度乘之。得是。

月平行一十三度三十六分八十七秒半。

求交定度。

置交常度全分。以盈縮差盈加縮減之。則得。

推日食正交中交限度。

視交定度全分。如在七度已下。或三百四十二度已上者。皆爲食在正交。如在一百七十五度已上。二百

△二度已下者。皆謂食在中交。

不在限內不食。

求中前中後分。

視定朔小餘分。在半月周已下者。用減半月周餘爲中前分。如在半月周已上者。減去半月周餘爲中後分。半月周五千分。

求時差分。

置半月周。減去中前或中後分。餘爲法。以乘中前中後分。得數如九千六百分而一。卽是。

求食甚定分。

視推得時差分。中前以減。中後以加。皆加減定朔小餘則是。

求距午定分。

置中前或中後分。加時差則是。

求食甚入盈縮麻分。

置經朔入盈縮麻日及分秒。加入定期大餘。及推出食甚定分。減去經朔大小餘全分。餘則是。

元是盈麻爲
盈麻定度分。

元是縮麻爲
縮麻定度分。

求食甚入盈縮麻差度分。

置食甚入盈縮麻定度全分。以立成各日下盈縮如分乘之。得數定位。加其下盈縮積度。滿萬爲度。不滿

爲分秒。

如遇未麻用反
減半歲周之數

求食甚入盈縮麻行定度分。

置食甚入盈縮麻定度全分。以推出盈縮麻差分。盈加縮減。則是。

求南北泛差。

視食甚入盈縮麻行定度全分。如在周天象限已下爲初限。已上用減半歲周餘爲末限。自相乘得數。如

一千八百七十而一爲度。不滿退除爲分秒。用減四度四十六分。餘爲南北泛差。

象限九十一度三十一分四十三秒七十五微。

半歲周一百八十二度六十二分一十二秒半。

求南北定差。

置南北泛差全分以推得距午定分乘之得數如半晝分而一則是在盈初縮末者正交減中交加在縮初盈末者正交加中交減

求東西泛差

視食甚入盈縮厯行定度分與半歲周相減餘數與定度分相乘定位如一千八百七十而一爲度不滿退除爲分秒則是

求東西定差

置東西泛差全分以推得距午定分乘之以日周四分之一除之則是在泛差已上者倍汎差減之餘爲定差日周四分之一二千五百在盈厯中前者正交減中交加在盈厯中後者正交加中交減在縮厯中前者正交加中交減在縮厯中後者正交減中交加

求正交中交定度分

視食在正交者置正交度在中交者置中交度以南北東西二定差加減之則是○正交三百五十七度六十四分○中交一百八十八度△五分

求日食入陰陽厯去交前後度分

視所得交定度如在中交限已下用減中交限度餘爲陽厯交前度已上者減去中交限度餘爲陰厯交後度○如在正交限已下用減正交限度餘爲陰厯交前度已上者減去正交限度餘爲陽厯交後度

及分秒

求日食分秒。

置所得交前交後度。如在陽厓。用減陽食限六度。

不及減者不食。

餘爲實。如定法六十而一。如在陰厓。用減陰食

限八度。

不及減者不食。

餘爲實。如定法八十而一。爲日食分秒。

求日食定用分。

置推得日食分秒。與日食二十分相減。餘有爲實。以日食分秒乘之。爲開方積。以平方法開之。爲開方數。用五千七百四十爲法乘之。如定限行度而一。則是○定限行度內視立成定限日下遲疾行度。是遲用遲。是疾用疾。內減去日行八分二十秒。餘卽得。

求初虧分并時刻。

置食甚定分。減去定用分。餘爲初虧分。依發斂術推之卽得。

求食甚分并時刻。

置食甚定分。依發斂術推之。得食甚時刻。

求復圓分及時刻。

置食甚定分。加入定用分。爲復圓分。依發斂術推之得時刻。

求日食所起方位。

視日食入陰陽麻交前後度。若在陽麻。初虧西南。甚於正南。復圓東南。若在陰麻。初虧西北。甚於正北。復圓東北。若食八分已上。或是陰麻。或是陽麻。皆初起正西。復圓正東。此據午地而言。

驗日有帶食。

視其日日出入分在初虧已上。食甚已下者。俱有帶食。

求帶食分秒。

食在晨刻。日出分在初虧分已下。食甚分已上。將初虧分與日出分相減。餘爲實。以日食分秒乘之。如定用分而一。爲日未出已食分秒。○食甚分與日出分相減。餘爲實。以日食分秒乘之。如定用分而一。爲日已出見食分秒。○若先得未食分秒。以減日食分餘。爲見食分秒。不必再求。下做此。或日出分在食甚分已下。將食甚分與日出分相減。餘爲實。以日食分秒乘之。如定用分而一。爲日未出已復光分秒。○復圓分與日出分相減。餘爲實。以日食分秒乘之。如定用分而一。爲日已出見復光分秒。

食在昏刻。日入分在食甚分已下。復圓分已上。將食甚分與日入分相減。餘爲實。以日食分乘之。如定用分而一。爲日未入見食復光分秒。○復圓分與日入分相減。餘爲實。以日食分乘之。如定用分而一。爲日已入不見復光分秒。○或日入分在日食分已上。將初虧分與日入分相減。餘爲實。以日食分秒乘

之。如定用分而一。爲日未入見食復光分秒。○復圓分與日入分相減。餘爲實。以日食分乘之。如定用分而一。爲日已入不見復光分秒。○或日入分在日食分已上。將初虧分與日入分相減。餘爲實。以日食分秒乘

之如定用分而一爲日未入見食分秒○食甚分與日入分相減餘爲實以日食分乘之如定用分而一爲日已入不見食分秒

求食甚日躔黃道宿次度分秒

置食甚入盈縮麻定度如在盈麻就爲定積在縮麻加半歲周爲定積加入歲前天正冬至加時黃道宿度分秒按黃道宿次從箕一度起以減定積餘則是

推月食法

諸合用數同日食但易以經望全分定望全分晨分昏分餘同

求交常度

置有食之望下

餘同
日食

月平度

見前

求交定度

置交常度全分盈加縮減其盈縮差分爲交定度不及減者加交終度減之○交終度三百六十三度七

五四一九

求卯西前後分

視定望小餘在日周四分之一已下爲卯前分已上用減半日周餘爲卯後分如在日周四分之三已下

減去半日周爲酉前分。已上用減日周餘爲酉後分。○日周一萬。○半日五千。○日周四分之一二千五百。○日周四分之三七千五百。

求時差分。

以推得卯前卯後、或酉前酉後分。減日周餘數則是。

減餘以百約之。千分爲十分。百分爲單分。

○又法以卯酉前後分自乘四萬

七千八百而一則是。

求食甚定分。

置定望小餘全分。加時差分則是。

求食甚入盈縮厯分。

置經望入盈縮厯日及分秒。加入定望大餘及食甚定分。減去經望大小餘全分。餘則是。元是盈厯。元是縮厯。同日食推。

求食甚入盈縮差分。

置食甚入盈縮厯定度分。

止用小餘。

以立成各日下盈縮加分乘之。得數定位。以加其下盈縮積度。滿萬爲度。

不滿爲分秒。

求食甚入盈縮麻行定度分秒

同日食推

求月食入陰陽麻

視交定度。如在交中已下為入陽麻。已上減去交中度。餘為入陰麻。○交中度一百八十一度八九六七。

求月食交前交後度

視所得入陰陽麻。在後準一十五度五已下為交後。如在前準一百六十六度三九六八已上。以減交中

度。餘為交前度。

求月食分秒

以去交前後度。

不用南北東西差

用減月食限一十三度△五分。

不及減者不食

餘為實。如定法八十七而一則是。

月食在十

分以下只用三限辰刻法。若在十分已上用既內既外五限辰刻法。

月食三限。初虧。食甚。復圓。

月食五限。初虧。食既。食甚。生光。復圓。

求月食定用分

置推得月食分秒。與月食三十分相減。餘數與月食分秒相乘。定位為方積。依開平方法開之。得開方數。

又以四千九百二十 乃六因八刻
二十分數 為法乘之。得數定位。如本日定限行度而一則是。 定限行
度見前

求初虧分并時刻。

以定用分減食甚定分為初虧。依發斂術推之則得。 不及減者如日
周一萬減之

求食甚分時刻。

置食甚定分。依發斂術推之即得。

求復圓分及時刻。

以定用分加食甚定分。為復圓分。依發斂術推之即得。 已上三限
辰刻法

求既內分。 此以下五限辰刻法。
月食十分已上用之。

視月食十分已上者。減去十分。以單分秒與十五分相減。餘數相乘。為五限開方積。依開平方法開之。為五限開方數。以四千九百二十乘之。如定限行度分而一即是。 與前
同 初虧分。 求既外分。 以既內

分減定用分則是。 求食既分。 以初虧分加入既外分為食既分。依發斂術推之得時刻。 求食甚分。 以食既分加入既內分即是。 求生光分。 以食甚分加入既內分為生光分。依發斂術推之得

時刻。求復圓分。以生光分加入既內分即復圓分。滿一萬去之。依發斂術求時刻。

求月食入更點。

五限三
限同。

視推得食甚入盈縮麻。元是盈麻初末。用冬至後縮麻初末。用夏至後各日晨分倍之。以五千分爲法而一爲更法。又五百分爲法而一爲點法。

求初虧更點。

視推得初虧全分。如在晨分已下。加入晨分。昏分已上。減去昏分。餘以更法除之爲更。不盡以點法約之。

爲點。

食既食甚生光

復圓更點做此

求月食起復方位。

視月食在陽麻。初起東北。甚於正北。復圓西北。在陰麻。初起東南。甚於正南。復圓西南。食八分已上者。不問陰陽麻。皆起於正南。復圓正西。此皆據午地而言也。

驗月有帶食。

視其日月出分。在初虧已上。食甚已下者。俱有帶食。

求帶食分秒。

食在昏刻。日入分在初虧分已上。食甚分已下。將初虧分與食甚分相減。餘爲實。以月食分秒乘之。如定

用分而一。爲月未出已食分秒。○食甚分與日入分相減。餘爲實。以月食分秒乘之。如定用分而一。爲月已出在天見食分秒。

若先得未見食分秒以減月食分。餘卽見食分秒。不必再求下做此。

或日入分在食甚分已上。將食甚分與日入分相

減。餘爲實。以月食分秒乘之。如定用分而一。爲月未出已復光分秒。○復圓分與日入分相減。餘爲實。以月食分秒乘之。如定用分而一。爲月已出在天見復光分秒。

食在晨刻。日出分在食甚分已上。復圓分已下。將食甚分與日出分相減。餘爲實。以月食分秒乘之。如定用分而一。爲月未入在天見食復光分秒。○復圓分與日出分相減。餘爲實。以月食分秒乘之。如定用分而一。爲月已入不見復光分秒。○或日出分在食甚分已下。將初虧分與日出分相減。餘爲實。以月食分秒乘之。如定用分而一。爲月未入在天見食分秒。○食甚分與日出分相減。餘爲食。以月食分秒乘之。如定用分而一。爲月已入不見食分秒。

求食甚月離黃道宿次度分秒。

置食甚入盈縮麻行定度。如在盈麻。加半周天一百八十二度六二八七五爲定積。在縮麻。加半歲周一百八十二日六三一五。更加半周天滿周天三百六十五度二五七五去之。爲定積。各加入歲前冬至加時黃道宿度分秒。按黃道宿次。從箕一度起以減定積。餘則是。

一法如在縮麻。減七十五秒爲定積。

加半歲周半周天。較減一周天少七十五秒故也。

周天少七十五秒故也。

明書卷四十七

志二

厯法志四

大統厯名義定數及釋文。

正步法。

步氣朔。

歲周三百六十五日二千四刻二十五分。

實測

此一歲日與天會之數。

歲實三百六十五萬二千四百二十五分。

卽歲周對法而言謂之實。

通餘五萬二千四百二十五分。

歲實內滿旬周十六去之餘數。

朔策二十九日五十三刻△五分九十三秒。

月與日會一次日數。

朔實二十九萬五千三百△五分九十三秒。

卽朔策以數計。

通閏一十△日八千七百五十三分八十四秒。

歲周內減去十二朔策。

氣策一十五日二千一百八十四分三十七秒半。以歲周分爲二十四。

望策一十四日七千六百五十二分九十六秒半。半朔策乃半月數。

弦策七日三千八百二十六分四十八秒少。四除朔策。

沒限七千八百一十五分六十二秒半。以十六日內減氣策餘數。

氣盈二千一百八十四分三十七秒半。氣策減十五全日餘數。

盈策九日六千六百九十五分二十八秒。

朔虛四千六百九十四分△七秒。以三十日內減朔策餘數。

虛策二日九千一百△四分二十三秒。

旬周六十萬。即紀法六十日 甲子一周之數。

氣應五十五萬△六百。即五十五日△六刻 以每歲冬至日分秒。即次年氣應不用積年。

閏應二十△萬一千八百五十分。即二十日一十八刻五十分 每歲閏餘。即次年閏應不用積年。

步發斂。

貞策三日△四百三十六分十七秒半。即土正衰 五除歲周。減去五氣策餘數。

月閏九千△六十二分八十二秒。十二除通閏。併二氣策內減朔策亦同。

閏限一十八萬六千五百五十二分△九秒。朔實內減通閏。

辰法一萬。以小餘十二乘滿萬爲一辰。若加二止用千爲辰法。

半辰法五千。以小餘十二乘滿萬爲一辰。五千分命起子初。刻法一千二百。不滿辰法以十二除爲刻法。

步日躔。

周天數。見前以三百六十五度四分度之一倍之。減歲周卽得。

周天分三百六十五萬二千五百七十五分。

半周天。見前

像限九十一度三十一分四十三秒太。乃周天四之一。

歲差一分五十秒。周天內減歲周餘數。

半歲周一百八十二日六二一二五。以歲周半之。

氣象限九十一日三千一百△六分二十五秒。歲周四之一。

盈初縮末限八十八日九千△九十二分二十五秒。

冬至抵春分前三日。日行周天一象。秋分後三日。抵冬至日行周天一象。

氣象限內。減盈縮極

差二日四千△一十四。

縮初盈末九十三日七千一百二十△分二十五秒。

春分前三日至夏至日行周天一象。夏至抵秋分後三日。日行周天一象。

氣象限。加盈縮極差

二日四千△一十四。

周應三百一十五萬一千△七十五分。

一名度應。

步月離。

轉周二十七日五十五刻四十六分。此月行一周天之數。

轉終分二十七萬五千五百四十六分。即轉周。

轉中一十三日七千七百七十三分。半轉終。

月平行度。見前。

周限三百三十六。以十二限二十分乘轉周。中限半之。象限又半於中限。

限平度一百△九分六十二秒。以限刻八百二十分乘月平行度百約之。

轉差一日九千七百五十九分九三。以朔實減轉周餘數。

弦七日三十六刻二十六分四十八秒少。即步氣朔內數。

上弦九十一度三一四三太。周天象限。

望度即半周天。

見月食未段。

下弦二百七十三度九十四分三十一秒少。周天四之三。

太陽限行八分二十秒。

轉應一十三萬一千九百△四分。

先以元至元辛巳歲前十一月經朔距八轉日用一十三萬△二百△五分。後以洪武甲子冬至爲厥元。照原數扣算。

步交會。

交周日二十七日二十一刻二十二分二十四秒。

交終分二十七萬二千一百二十二分二十四秒。即前數。

交中一十三日六千△六十一分一十二秒。即前數之半。

交差二日三千一百八十三分六十九秒。朔實內減交終分。

交望即望策。

見前。

交終度三百六十三度七十九分三十四秒一九六。以月平行度乘交周。

交中度一百八十一度八十九分六十七秒△九八。即前數之半。

正交度三百五十七度六十四分。

中交度一百八十八度△五分。

日食陽麻限六度。定法六十。十除食限
得六十。

日食陰麻限八度。定法八十。十除食限
得八十。

月食限一十三度△五分。定法八十七。十五除食限
得八十七。

交應二十六萬△一百八十七分八十六秒。元至元辛巳歲前十一月朔。距入交
日後用二十六萬△三百八十八分。

大統麻先用後革捷法附錄

超年捷法

求冬至加通餘

五萬二千四百二十五

滿紀法

六去之十

求閏餘加通閏一十△萬八千七百五三八四。

求經朔加五十四萬三千六百七十一分一六。

十二朔實去紀法

本年有閏加八十三萬八千九百七十七分△

九秒。

十三朔實去紀法

俱滿紀法去之。

求盈縮麻加一百七十一萬七千四百五八六六。

十二朔實去半歲周

季孟相接年加一十八萬六千五五二△九。

十三朔實

去全歲周

求遲疾麻加九萬九千三百四六一六。

歲實減通閏去轉終分小轉中

季孟相接年加一十一萬九千一百△六分△九秒。

歲周加一朔實減通閏滿

轉終分小轉中去之數

求交汛。加六千△八十二分△四秒。歲實減通閏。去交終分。季孟相接年。加二萬九千二百六十五分七三。歲實加一朔。實減通閏。去

交終分。

求冬至日躔赤道宿度。減一分五十秒。

求冬至日躔黃道宿度。減一分三十八秒五十微。

減積捷法。

減紀法。即旬周。

一六減六。二六減十二。三六減十八。四六減二十四。五六減三十。六六減三十六。七六

減四十二。八六減四十八。九六減五十四。法尾至萬而止。

減朔實。

一朔二十九萬五三△五九三。

二朔五十九萬△六一一八六。

三朔八十八萬五九一七七九。

四朔一百一十八萬一二三三七二。

五朔一百四十七萬六五二九六五。
六朔一百七十七萬一八三五五八。
七朔二百△萬七一四一五一。
八朔二百三十六萬二四四七四四。
九朔二百六十五萬七七五三三七。
減轉終分。

一轉二十七萬五五四六。
二轉五十五萬一△九二。
三轉八十二萬六六三八。
四轉一百一十△萬二一八四。
五轉一百三十七萬七七三△。
六轉一百六十五萬三二七六。
七轉一百九十二萬八八二二。
八轉二百二十△萬四三六八。
九轉二百四十七萬九九四一。

減交終分。

一交二十七萬二一二二二四。

二交五十四萬四二四四四八。

三交八十一萬六三六六七二。

四交一百△八萬八四八九六。

五交一百三十六萬△六一一二△。

六交一百六十三萬二七三三四四。

七交一百九十△萬四八五五六八。

八交二百一十七萬六九七七九二。

九交二百四十四萬九一△△一六。

減周天分。

一周三百六十五度二五七五。

二周七百三十△度五一△五。

三周一千△九十五度七七二五。

四周一千四百六十一度△三△△。

五周一千八百二十六度二八七五。
六周二千一百九十一度五四五△。
七周二千五百五十六度八△二五。
八周二千九百二十二度△六△△。
九周三千二百八十七度三一七五。

減赤道積度。

角二百四十八度四△七五。
亢二百五十七度六△七五。
氐二百七十三度九△七五。
房二百七十九度五△七五。
心二百八十五度△△七五。
尾三百△五度一△七五。
箕三百一十五度五△七五。
斗三百四十四度七△七五。
牛三百四十七度九△七五。

黃道積度鈐。

箕九度五九△。

斗三十三度△六△。

牛三十九度九六△。

女五十一度△八△。

虛六十六度八七五。

危七十六度△三七五。

室九十四度三五七五。

壁一百△三度六九七五。

奎一百二十一度五一七五。

婁一百三十三度九二七五。

胃一百四十九度七三七五。

昴一百六十△度六九七五。

畢一百七十七度三一七五。

觜一百七十七度三六七五。

參一百八十七度六四七五。
井二百一十八度六七七五。
鬼二百二十△度七八七五。
柳二百三十三度七八七五。
星二百四十△度△九七五。
張二百五十七度八八七五。
翼二百七十七度九七七五。
軫二百九十六度七二七五。
角三百△九度五九七五。
亢三百一十九度一五七五。
氏三百三十五度五五七五。
房三百四十一度△三七五。
心三百四十七度三△七五。
尾三百六十五度二五七五。